

經訓要錄

柯昌泗題



經訓要錄序

纂輯格言之作世不少其書然純從經籍取材者今尙未之前見余謂格言精義多本於經經教之大綱紀本根彌綸纖悉固不當僅以格言求之而即其所流露之訓誠爲先哲所留遺者作格言觀亦往往警關精微爲後來所不逮孟子所謂恒言左氏所謂前志實即格言一類特治經者尙未專注及之耳余髫年佔畢皓首無成適與同郡清苑郭君立志同客京師君朝夕過從孜孜多識偶以語君謂可試編備覽君雅謂善囑速成之乃勉事擷錄排類綱領一類之中又以意比次略使義理相條貫業旣畢爰取南容白圭之事名之曰三復編人亦稱之爲經訓要錄郭君復爲之參稽注疏繫屬詮釋自維淺學急就所爲難期必當而郭君所以見督與其殷殷鼓舞之意則固可以追會賢勵末世是

經訓要錄序

二

編之出不過以通俗之方藉宣經義若學者能緣此而更進讀經則尤余與郭君之深望矣

民國二十八年十二月蠡孫松齡序

經訓要錄目錄

- | | |
|-----|----|
| 第一類 | 天道 |
| 第二類 | 民彝 |
| 第三類 | 羣揆 |
| 第四類 | 倫紀 |
| 第五類 | 禮本 |
| 第六類 | 政符 |
| 第七類 | 人鑑 |
| 第八類 | 勸學 |
| 第九類 | 約知 |
| 第十類 | 慎言 |

經訓要錄 目錄

- | | |
|------|---------|
| 第十一類 | 正習 |
| 第十二類 | 教謙 |
| 第十三類 | 教勤 |
| 第十四類 | 教憂教豫 |
| 第十五類 | 教敬 |
| 第十六類 | 教儉 |
| 第十七類 | 教誠教恕教自省 |
| 第十八類 | 教恆 |
| 第十九類 | 明哲 |

經訓要錄

蠡縣孫松齡輯錄

清苑郭立志繫註

第一類 天道 二十三則

莫之爲而爲者天也，莫之致而至者命也。

孟子

【趙注】莫無也，人無所欲爲而橫爲之者，天使爲也，人無欲致此事而此事自至者，是其命而已矣，故曰命也。【孫疏】人莫之爲然而爲然者，故曰天使然也，人莫能致之此事而其事自至者，是其命有是也，言天與命者，究其義則一也，以其無爲而無不爲，故曰天也，天之使我有是之謂命，故曰命也，天下善否，天實使之然也，祿位器服乃其所命故也。

【朱註】非人力所爲而自爲，非人力所致而自至，以理言之謂之天，自人

言之謂之命，其實則一而已。

【按】朱註最簡賅，而近人餘杭章太炎氏解命之義尤確。說見劉漢微言曰天之蒼然非

有主宰而自古言命者若謂發號諄諄矣獨有荀卿深達理要正名篇云節遇謂之命此義應思依此國土現此根身乃至窮通壽夭之類此皆所謂遇也荀子必言節遇者何哉節本作弓命本爲令令者集弓其義即謂合符因果酬業歷然不爽比於合符故謂之弓弓無鉏鍤自然混合非有帝天爲行詔令亦非若范縝所言落花隨風或墮茵蔯或墮藩溷者矣然人心違順本無恒劑其有乍發決心能爲禍福者非必因於宿業而受之者誠爲遇也弓遇並言其義始了又曰凡事成就非一正因爲之以弓遇必賴助緣方得成果命爲正因若無智力爲其助緣果不成就以弓遇言命必正因助緣相待而就，執此可解儒墨之爭矣。儒家安命，其所謂命乃此所謂莫之爲而爲，莫之致而至者，即非人力所爲而自爲，非人力所致而自至者。莊子云知其無可奈何而安之若命義亦同斯墨家非命，其所謂命乃謂人力所可爲而不爲，所可致而不至者，其界說不同，故其是非樊然，然實相反而相成也。

天道遠，人道邇。

左傳鄭子產語（昭十八年）

【杜注】傳言天道難明。

【按】天道遠者，言其理渺茫難明；人道邇者，以其切於日用而彰明較著也。

不愧於人，不畏於天。

詩小雅
禮表記引之

【鄭注】言人有所行，當慙怖於天人也。【孔疏】小雅曰：不愧於人，不畏於天者，此詩何人斯之篇，是蘇公刺責暴公，暴公讒譖於己，是不愧慙於人，不畏懼於天，引之者，言人之行，當須愧於人，畏於天也。【應氏曰】縱有懈怠而欲爲惡者，獨不愧於人而畏於天乎。

【按】此二語亦可解爲以人事爲主，言不愧於人則自不畏於天。

天生烝民，有物有則。

詩大雅
孟子引之

【孟子】孔子曰：爲此詩者，其知道乎？故有物必有則。

【毛傳】烝衆也、物、事也、則、法也、

【孫疏】所謂物者、即自人之四肢五藏六腑九竅、達之於君臣父子夫婦兄弟朋友、無非物也、所謂則者、即仁之於父子、義之於君臣、禮之於夫婦兄弟、信之於朋友也、是無非有物則有則也、

【朱註】有物必有法、如有耳目則有聰明之德、有父子則有慈孝之心、

【按】朱註與孫疏略同、

民受天地之中以生、所謂命也、是以有動作禮義威儀之則、以定命也、能者養之以福、不能者敗以取禍、

左傳周劉康公語（成十三年）

【孔疏】天地之中、謂中和之氣也、民者人也、言人受此天地中和之氣、以得生育、所謂命也、命者敎命之義、若有所稟受之辭、故孝經說云、命者人之所稟受度是也、命雖受之天地、短長有本、順理則壽考、逆理則夭折、是以有動作禮義威儀之法則、以定此命、言有法則命之長短得定、無法則

夭折無恒也。故人有能者養其威儀禮法以往適於福，或本分之外更得延長也。不能者敗其威儀禮法，而身自取禍，或本分之內仍有減割也。

禍福無門，唯人所召。

左傳魯閔子馬語（襄二十三年）

【按】禍福無門者，謂禍福無定所，唯在各人自召而已。老子云：禍兮福所倚，福兮禍所伏。鷓冠子曰：憂喜聚門，吉凶同城。董仲舒云：弔者在門，慶者在廬，皆此義。

禍福無不自己求之者。

孟子

【孫疏】如所謂夫人必自畏然後人畏之，夫人必自侮然後人侮之，是其禍福無有不自己求之意也。

自作孽，不可活。

孟子引書太甲

【朱註】孽禍也，活生也。書作迨，迨猶緩也。此言禍之自己求者，下民之孽，非降自天。詩小雅左傳引之（僖十五年）

【鄭箋】孽、妖孽，謂相爲災害也。【孔疏】言使下民之有妖孽，相與爲災害者，非降從天墮也。

天視自我民視，天聽自我民聽。孟子引書太甲

【趙注】自從也。天之視聽，從人所欲也。【孫疏】天之所視，從我民之所視。天之所聽，亦從我民之所聽。

民之所欲，天必從之。左傳鄒子羽引泰誓（昭元年）又左傳魯穆叔亦引此語（襄三十一年）

【孔傳】言天除惡樹善與民同。

惟命不于常。左傳引周書（成十六年）禮記大學引同

【孔傳】當念天命之不於常，汝行善則得之，行惡則失之。【孔疏】唯上帝之命，不常於一人也。言善則得之，惡則失之。

神福仁而禍淫。左傳晉士貞伯語（成五年）

【按】此與尙書天道福善禍淫同義，即孔傳所謂政善天福之，淫過天禍。

之也。

皇天無親，惟德是輔。左傳虞宮之奇引周書（僖五年）

【孔傳】天之於人，無有親疎，惟有德者則輔佑之。

積善之家，必有餘慶，積不善之家，必有餘殃。易文言

【孔疏】積善之家，必有餘慶，積不善之家，必有餘殃者，欲明初六其惡有漸，故先明其所行善惡，事由久而積漸，故致後之吉凶。

善人富謂之賞，淫人富謂之殃。左傳魯叔孫豹語（襄二十八年）

【按】左傳原文，子服惠伯謂叔孫曰：天殆富淫人，慶封又富矣，穆子曰：善人富謂之賞，淫人富謂之殃，天其殃之也，其將聚而殲旃，蓋謂善人富乃天所以賞之，淫人富乃天將以殃之，慶氏之亡，天先使之聚族而居，富於其舊，終於聚殲，其富之也，謂之殃，不亦可乎。

天之假助不善，非祚之也，厚其凶惡而降之罰也。左傳晉叔向語（昭十一年）

【按】祚，福也。言天之借助不善者，非以福之，乃所以重其凶惡而降之懲罰也。

遠惡而後棄，善亦如之，德遠而後興。

左傳宋向戌語（昭四年）

【杜注】惡及遠方則人棄之。

【按】遠惡而後棄者，言惡及遠方而後人棄之，善亦如之，謂善亦必及於永遠而後興，此善不積不足以成名，惡不積不足以殺身之愆。

聖人有明德者，若不當世，其後必有達人。

左傳魯臧孫紘語（昭七年）

【杜注】聖人之後，有明德而不當大位，謂正考父。【孔疏】聖人謂殷湯也。不當世謂不得在位爲國君也。上文具言考父之德，知此聖人之後，有明德而不得在世當大位者，止謂正考父也。既是聖人之後，而又有明德，身無貴位，必慶隆子孫，故言其後必有達人，謂知能通達之人。

君子創業垂統，爲可繼也，若夫成功則天也。

孟子

【朱註】創造統緒也，言君子造基業於前，而垂統緒於後，但能不失其正，令後世可繼續而行耳。若夫成功，則豈可必乎？

敬鬼神而遠之，論語

【包氏曰】敬鬼神而不黷，

【程子曰】人多信鬼神，惑也，而不信者又不能敬，能敬能遠，可謂知矣，

人棄常則妖興，左傳魯申繻語（莊十四年）

【孔疏】人棄典常則妖自興，謂既不能彊，又不能弱，失常度也，

卜以決疑，不疑何卜，左傳楚鬬廉語（桓十一年）

【按】此與天道遠，人道邇之義相近，蓋凡人事之不可知者，則疑生，而以卜決之，至人事之可知者，則無所疑，更何以卜爲？此朱子所謂專用力於人道之所宜，而不惑於鬼神之不可知者也。

第二類 民彝 二十三則

民之秉彝，好是懿德。詩大雅孟子引之

【孟子】民之秉夷也，故好是懿德。【朱註】夷詩作彝，常也，懿美也。有耳目則有聰明之德，有父子則有慈孝之心，是民所秉執之常性也，故人情無不好此懿德者，以此觀之，則人性之善可見。

君子務本，本立而道生。論語

【朱註】務專力也，本猶根也，言君子凡事專用力於根本，根本既立，則其道自生。

仁人心也，義人路也。孟子

【孫疏】孟子言仁者是人之心也，是人人皆有之者也，義者是人之路也，是人人皆得而行之者也。

【朱註】仁者心之德，程子所謂心如穀種，仁則其生之性是也。然但謂之仁，則人不知其切於己，故反而名之曰人心，則可以見其爲此身酬酢萬變之主，而不可須臾失矣。義者行事之宜，謂之人路，則可以見其爲出入往來必由之道，而不可須臾舍矣。

仁，人之安宅也，義，人之正路也。

孟子

【孫疏】孟子言仁道乃人之所安之宅舍也，義乃爲人之正路也。

人皆有所不忍，達之於其所忍，仁也。人皆有所不爲，達之於其所爲，義也。

孟子

【趙注】人皆有所愛，不忍加惡，推之以通於所不愛，皆令被德，此仁人也。人皆有所不喜爲，謂貧賤也，通之於其所喜爲，謂富貴也，抑情止欲，使若所不喜爲此者，義人也。

【朱註】惻隱羞惡之心，人皆有之，故莫不有所不忍不爲，然以氣質之偏，

物欲之蔽，則於他事，或有不能者，但推所能，達之於所不能，則無非仁義矣。

【按】原書下文人能充無欲害人之心，而仁不可勝用也，人能充無穿窬之心，而義不可勝用也，即此文註脚，二心一爲有所不忍，一爲有所不爲，充即此所謂達也。

人有不爲也，而後可以有爲。孟子

【趙注】人不爲苟得，乃能有讓千乘之志也。【孫疏】此章言貴賤廉恥，乃有不爲，不爲非義，義乃可由也。孟子言人之有不爲非義之事，然後可以有爲其義矣。【程子曰】有不爲，知所擇也，惟能有不爲，是以可以有爲，無所不爲者，安能有所爲邪。

仁者以其所愛及其所不愛，不仁者以其所不愛及其所愛。孟子

【趙注】仁者用恩於所愛之臣民，王政不偏，普施德教，所不親愛者，并蒙

其恩澤也，不仁者用不仁之政，加於所不親愛，則有災傷，所親愛之臣民，亦并被其害。

【朱註】親親而仁民，仁民而愛物，所謂以其所愛，及其所不愛也。

論語

不仁者不可以久處約，不可以長處樂，仁者安仁，知者利仁。

【邢疏】不仁者不可以久處約者，言不仁之人，不可令長久處貧約，若久困則爲非也，不可以長處樂者，言亦不可令長處於富貴逸樂，若久長處樂則必驕佚，仁者安仁者，謂天性仁者自然安而行之也，知者利仁者，知能照識前事，知仁爲美，故利而行之也。

講信修睦，謂之人利，爭奪相殺，謂之人患。

禮記禮運

【孔疏】信是深隱，故須講，睦恐乖離，故云修。

【陳註】有禮以治之，則人利由此而生，禮廢則人患由此以起，明其利患，知所趨避，然後能使之爲一家，爲一人也。

貨惡其棄於地也，不必藏於己，力惡其不出於身也，不必爲己。

禮記禮運

【孔疏】貨惡其棄於地也，不必藏於己者，貨謂財貨也，既天下共之，不獨藏府庫，但若人不收錄，棄擲山林，則物壞世窮，無所資用，故各收寶而藏之，是惡棄地耳，非是藏之爲己有，乏者便與也，力惡其不出於身也，不必爲己者，力謂爲事用力，言凡所事不憚劬勞而各竭筋力者，正是惡於相欺，惜力不出於身耳，非是欲自營贍，故云不必爲己也。

生有益於人，死不害於人。

禮記檀弓成子高述古語

【按】孔疏謂此節論臨死不忘儉之事，以成子高主薄葬謂爲死不害人也，蓋其生也勤，乃有益於人，其死也儉，乃不害於人，然此以狹義言也，惟衆善奉行，始爲生有益於人，諸惡不作，始爲死不害於人耳。

君子不以其所以養人者害人。

孟子

【孫疏】言君子不以所養人之土地，而殘賊其民。

【朱註】土地本生物以養人，今爭地而殺人，是以其所以養人者害人也，殺人以自生，亡人以自存，君子不爲也。公羊傳（桓十一年）

【按】此乃釋上文不害人以行權之義。

君子不厄人。公羊傳（僖二十二年）

【按】厄與阨同，困也。

臨財毋苟得，臨難毋苟免。禮記曲禮

【鄭注】臨財毋苟得，爲傷廉也，臨難毋苟免，爲傷義也。

【陳註】毋苟得，見利思義也，毋苟免，守死善道也。

【按】岳武穆謂文官不愛錢，武官不怕死，則天下太平。林傳甲氏謂不愛錢，即見利思義，亦即臨財毋苟得，不怕死，即見危授命，亦即臨難毋苟免之旨，足見自古英雄未有不明經義者也。

以直報怨，以德報德。論語

【邢疏】言當以直道報讎，怨以恩德報德也。

【朱註】於其所怨者，愛憎取舍，一以至公而無私，所謂直也。於其所德者，則必以德報之，不可忘也。

柔亦不茹，剛亦不吐。詩大雅

【鄭箋】柔，猶濡霏也。剛，堅強也。（廣雅云茹食也。）【孔疏】雖柔亦不茹，雖剛亦不吐，不欺侮於鰥寡孤獨之人，不畏懼於彊梁禦善之人，不侮不畏，即是不茹不吐。

非所怨，勿怨。左傳衛獻公引古語（襄二十六年）

【杜注】所怨在親親。

【接】非所怨勿怨者，言非所當怨者勿怨之也。

敵惠敵怨，不在後嗣。左傳晉與豸引前志語（文六年）

【杜注】敵猶對也。若及子孫則爲非對，非對則爲遷怒。【孔疏】敵惠謂

有惠於彼，不可望彼人之子報，敵怨謂有怨於彼，不可讎彼人之子，父祖受人之惠，子孫自可不忘，要有恩於其父祖，不可求報於彼子孫，子孫或時不知，乃是更復長怨，故惠怨皆不在後，是爲忠恕之道也。

私讎不及公，好不廢過，惡不去善。

左傳晉王生語（哀五年）

【杜注】公，公家之事也。

【接】私讎不及公者，言不以私害公也，好不廢過者，言雖好之，而於其人之過也，則不能爲之掩，惡不去善者，言雖惡之，而於其人之善，則不可爲之隱也。

復讎不除害，朋友相衛而不相洵。

公羊傳（定四年）

【何注】復讎不除害者，取讎身而已，不得兼讎子，復將恐害已而殺之，朋友相衛者，同門曰朋，同志曰友，相衛不使爲讎所勝，不相洵者，洵出表辭，猶先也。

表者謂其戰時旅進旅退之限約，洵者謂不顧步伍勉力先往之意，不當先相擊刺，所以伸孝子之

恩。

君子之惡惡也疾始，善善也樂終。公羊傳（僖十七年）

【何注】君子之惡惡也疾始者，絕其始則不得終其惡，善善也樂終者，樂賢者終其行。

君子之善善也長，惡惡也短，惡惡止其身，善善及子孫。公羊傳（昭二十年）

【何注】惡惡止其身者，不遷怒也，善善及子孫者，君子不使行善者有後患也。

第三類 羣揆 二十一則

君子不犯非禮，小人不犯不祥。左傳齊晏子語（昭三年）

【杜注】去儉即奢爲非禮。

【按】不祥指習俗不以爲然，謂行之則必有禍之事，蓋非禮所得惡果之

爲人常見者、

無始禍、無怙亂、無重怒、

左傳秦子桑引史佚語（僖十五年）

【杜注】怙亂者、恃人亂爲己利也、

居是邦也、事其大夫之賢者、友其士之仁者、

論語

【邢疏】人以賢友爲助、大夫尊故言事、士卑故言友、大夫言賢、士言仁、互文也、

【朱註】賢以事言、仁以德言、夫子以子貢嘗悅不若己者、故以是告之、欲其有所嚴憚切磋、以成其德也、

國奢則示之以儉、國儉則示之以禮、

禮記檀弓

【陳註】會子主權、有子主經、是以二端之論不合、

【按】有子以古禮繩晏子、謂其儉而失禮、會子主禮當因世文質、隨時損

益，故必視國之奢儉，以爲張弛，而以晏子之儉，爲足矯時弊，乃以知禮子之也。

居處恭，執事敬，與人忠。論語

【邢疏】凡人居處多放恣，執事多懈惰，與人交則不盡忠，唯仁者居處恭謹，執事敬慎，忠以與人也。

【朱註】恭主容，敬主事，恭見於外，敬主乎中。

言忠信，行篤敬。論語

【邢疏】言忠信行篤敬者，必當言盡忠誠，不欺於物，行唯敦厚，而常謹敬也。

君子敬而無失，與人恭而有禮。論語

【邢疏】君子敬而無失，恭而有禮者，言君子但當敬慎而無過失，與人結交，恭謹而有禮也。

【朱註】言持己以敬而不間斷，接人以恭而有節文。

禮尚往來

禮記曲禮

【按】此即上文務施報之義，下文往而不來非禮也，來而不往亦非禮也。

即爲此作註腳。

禮無不答

禮記燕義

【鄭注】言聖人制禮，因事以託政，臣再拜稽首，是竭其力也，君答拜之，是其報以祿惠也。

【按】玩味經文，其義自明，文曰：禮無不答，明君上之禮也，臣下竭力盡能以立功於國，君必報之以爵祿，故臣下皆務竭力盡能以立功，是以國安而君寧，禮無不答，言上之不虛取於下也，上必明正道以道民，民道之而有功，然後取其什一，故上用足而下不匱也，是以上下和親而不相怨也，和寧禮之用也。

君子不以其所能者病人，不以人之所不能者愧人。禮記表記

【鄭注】病愧謂罪咎之。【孔疏】君子不以其所能者病人者，謂不以其之所能，使他人必能，若他人不能則爲困病，是不以所能之事病困於人也。不以人之所不能者愧人者，謂他人力所不能，必欲使之能行，若他人所不能，則以爲愧恥，故不以人之所不能，恥愧困苦於人，若能如此，亦仁者之行也。

君子不欲多上人。左傳鄭莊公語（桓五年）

【按】上人即陵人也。

善則稱人，過則稱己。禮記坊記

【按】原文子曰：善則稱人，過則稱己，則民不爭；善則稱人，過則稱己，則怨益亡。又子云：善則稱人，過則稱己，則民讓善，是一舉而三善具矣。

將求於人，則先下之。左傳（昭二十五年）

【按】先下之者，先以禮下之也。

人各有耦，

左傳鄧太子忽語（桓六年）

【按】耦，匹也，配也。本文齊侯欲以文姜妻太子忽，太子忽辭，人問其故，太子曰：人各有耦，齊大非吾耦也。言人各有相當之配偶，齊國大，非吾相當之配耦耳。

不佞不求，何用不臧，

詩衛風

【朱註】佞，害也，求，貪也，臧，善也。言能不佞不求，則何爲不善乎？

事君者量而后入，不入而后量，凡乞假於人，爲人從事者亦然。

禮記少儀

【鄭注】量，量其事意合成否。【孔疏】此一節明事君之法，事君者量而后入者，凡臣之事君者，欲請爲其事，先商量事意堪合以否，然后入而請之，不入而后量者，不得先入請見君，然後始商量成否，凡乞假於人爲人從事者亦然者，非直事君如此，凡乞貸假借於人，謂就人乞貸假借，爲人

從事，謂求請事人，如此之屬，亦須先商量事意成否，不可不先商量，即當其事，故云亦然。

【按】孟子謂孔子有見行可之仕，有際可之仕，有公養之仕，又答陳子問，謂古之君子，所就三，所去三，皆此處量之注腳，量字兼量事量人二義，量人較量事尤重，後世所謂非獨君擇臣，臣亦擇君也。

入竟（境）而問禁，入國而問俗，入門而問諱。

禮記曲禮

【鄭注】皆爲敬主人也，禁謂政教，俗謂常所行，與所惡也，國城中也，【孔疏】入竟而問禁者，竟界首也，禁謂國中政教所忌，凡至竟界，當先訪問主國何所禁也，入國而問俗者，國城中，城中如今國門內也，俗謂常所行也，入主人之城內，亦先問風俗常行也，入門而問諱者，門主人之門也，諱主人祖先君名，宜先知之，欲爲避之也，故注云皆爲敬主人也。

不窺密，不旁狎，不道故舊，不戲色。

禮記少儀

【鄭注】不窺密者、嫌伺人之私也、密隱曲處也、不旁狎者、妄相服習、終或爭訟、不道舊故者、言知識之過失、損友也、孔子曰、故舊不遺、則民不偷、不戲色者、暫變傾顏色爲非常、則人不長失敬也、【孔疏】此一節明在於僚類當自矜持之事、不窺密者、人當正視、不得窺覘隱密之處、鄭云、嫌伺人之私也、不旁狎、旁、猶妄也、不得妄與人狎習、或至忿爭、因狎而爭訟也、不戲色者、不戲弄其顏色、人當恒自矜持、尊其瞻視、若傾變顏色、爲非常褻慢、則人不復長久、失他人所敬、故云、則人不長失敬也、

善戲謔兮、不爲虐兮、詩衛風

【鄭箋】君子之德、有張有弛、故不常矜莊而時戲謔、

信近於義、言可復也、恭近於禮、遠恥辱也、因不失其親、亦可宗也、

論語

【朱註】信、約信也、義者事之宜也、復、踐言也、恭、致敬也、禮、節文也、因、猶依

也，宗猶主也，言約信而合其宜，則言必可踐矣，致恭而中其節，則能遠恥辱矣，所依者不失其可親之人，則亦可以宗而主之矣，此言人之言行交際，皆當謹之於始，而慮其所終，不然，則因仍苟且之間，將有不勝其自失之悔者矣。

君子不盡人之歡，不竭人之忠，以全交也。

禮記曲禮

【呂氏曰】盡人之歡，竭人之忠，皆責人厚者也，責人厚而莫之應，此交所以難全也，歡謂好於我也，忠謂盡心於我也，好於我者，望之不深，盡心於我者，不要其必致，則不至於難繼也。

【接】鄭注以歡謂飲食，忠謂衣服之物，其說牽強，不取。

第四類 倫紀 六十八則

父子主恩，君臣主敬。

孟子

【孫疏】父子則存乎孝慈之恩，君臣則存乎恭敬之義。

天下有達尊三，爵一，齒一，德一，朝廷莫如爵，鄉黨莫如齒，輔世長

民莫如德。孟子

【趙注】三者天下之所通尊也，孟子謂賢者有德，長者有齒，人君但有爵耳。【孫疏】言天下有達尊者三，爵一，齒一，德一，是也。自朝廷之間，莫如以爵爲之尊，自鄉黨之間，莫如以齒爲之尊，自輔治其世，長養其民，莫如以德爲之尊，以其朝廷貴貴在爵，故以爵爲朝廷之所尊，鄉黨長長在齒，故以齒爲鄉黨之所尊，賢者有德，故以之輔世而佐佑之，則天下待之而後治，以之長民則天下待之而後安，故以德爲輔世長民之所尊。

親親也，尊尊也，長長也，男女有別，此其不可得與民變革者也。禮記大傳

【鄭注】四者人道之常。

【陳註】此天地之常經，故不可變革。

未有仁而遺其親者也，未有義而後其君者也。

孟子

【趙注】仁者親親，義者尊尊，人無行仁而遺棄其親也，無行義而忽後其君長。

【朱註】此言仁義未嘗不利，遺猶棄也，後不急也，言仁者必愛其親，義者必急其君，故人君躬行仁義而無求利之心，則其下化之，自親戴於己也，於不可已而已者，無所不已，於所厚者薄，無所不薄也。

孟子

【趙注】已棄也，【孫疏】孟子言人君於不可棄去之者而棄去之，是其餘之類，無所不棄也，其於賞當所厚者反而薄之，是其餘之類，亦無所不薄也。

【朱註】已止也，不可止，謂所不得不爲者也，所厚，所當厚者也，此言不及者之弊。

其所厚者薄，而其所薄者厚，未之有也。

禮記大學

【孔疏】其所厚者薄而其所薄者厚未之有也者，此覆說本亂而未治否矣之事也。譬若與人交接，應須敦厚以加於人，今所厚之處，乃以輕薄，謂以輕薄待彼人也。其所薄者厚，謂已既與彼輕薄，欲望所薄之處，以厚重報已，未有此事也。言已以厚施人，人亦厚以報已也。若已輕薄施人，人亦輕薄報已，言事厚之與薄，皆以身爲本也。

【按】此承上文本末之義，其所厚者薄，上文所謂其本亂，而其所薄者厚，上文所謂而未治者否也。

信如君不君，臣不臣，父不父，子不子，雖有粟，吾得而食諸。

論語

【邢疏】諸之也，君不君，以至子不子，雖有其粟，吾得而食之乎，言將見危亡，必不得食之也。

居下位而不獲於上，民不可得而治也。獲於上有道，不信於友，弗獲於上矣。信於友有道，事親弗悅，弗信於友矣。悅親有道，反身不

誠不悅於親矣。孟子

【朱註】獲於上，得其上之信任也，誠實也，反身不誠，反求諸身，而其所以爲善之心有不實也。游氏曰：學至於誠身，則安往而不致其極哉。以內則順乎親，以外則信乎友，以上則可以得君，以下則可以得民矣。

以上總綱

事孰爲大，事親爲大，守孰爲大，守身爲大。孟子

【孫疏】孟子言人之所事者，何事爲大，以其事父母之親爲大也，人之所守者，何守爲大，以其守己之身爲大也。

【朱註】守身，持守其身，使不陷於不義也。

哀哀父母，生我劬勞。詩小雅

【鄭箋】哀哀者，恨不得終養父母，報其生長己之苦。【孔疏】言可哀之又可哀我父母也，其生長我也，其病勞矣，今不見其亡，所以深恨。

大孝終身慕父母，

孟子

【孫疏】爲大孝者，則終身思慕父母而不忘也。

睦於父母之黨，可謂孝矣。

禮記坊記

【鄭注】睦，厚也，黨猶親也。【孔疏】言親睦於父母之黨，乃得爲孝。【爾

雅】父之黨爲宗族，母與妻之黨爲兄弟。

孝子之事親也，有三道焉，生則養，沒則喪，喪畢則祭，養則觀其順也，喪則觀其哀也，祭則觀其敬而時也。

禮記祭統

【陳註】生事之以禮，死葬之以禮，祭之以禮，養以順爲主，喪以哀爲主，祭以敬爲主，時者以時思之，禮時爲大也。

子孫之守宗廟社稷者，其先祖無美而稱之，是誣也，有善而弗知，不明也，知而弗傳，不仁也，此三者，君子之所恥也。

禮記祭統

【按】上文明足以見之，仁足以與之，孔疏云，明足以見之，見其先祖之美

也、仁足以與之、與其先祖之銘也、故曰、有善弗知、謂之不明、知而弗傳、謂之不仁、以無爲有、謂之誣、

夫孝者、善繼人之志、善述人之事者也、禮記中庸

【孔疏】夫孝者、善繼人之志者、人謂先人、若文王有志伐紂、武王能繼而承之、尙書武成曰、予小子其承厥志、是善繼人之志也、善述人之事者、言文王有文德爲王基、而周公制禮以贊述之、故洛誥云、考朕昭子刑、乃單文祖德、是善述人之事也、

【按】考成也、昭明也、子指成王、刑法也、單盡也、言我所成明子之法、乃盡是汝文祖之德、此周公誥成王之言、

事死如事生、事亡如事存、孝之至也、禮記中庸

【陳註】始死謂之死、旣葬則曰反而亡焉、皆指先王也、

【按】言善於繼志述事者、於其先人之生死如一、存亡無異、斯爲至孝也、

鬼神非其族類，不歆其祀。左傳衛甯武子語（僖三十一年）

【杜注】歆，猶饗也。

【按】非其族類者，猶言非其子孫，雖祭祀之，而其鬼神亦不歆享之也。

神不歆非類，民不祀非族。左傳晉狐突語（僖十年）

【孔疏】傳稱非我族類，其心必異，則類族一也，皆謂非其子孫，妄祀他人父祖，則鬼神不歆享之耳。

立異姓以蒞祭祀，滅亡之道也。穀梁傳（襄六年）

【楊疏】言繒所以滅者，立嗣須分別同姓，而繒不別也，舊解云，別猶識也，言繒君唯識知國須立後，不能分別異姓之不得，按繒國名，左傳作鄆。

非我族類，其心必異。左傳魯季文子述史佚語（成四年）

【按】原文史佚之志有之，曰非我族類，其心必異，楚雖大，非吾族也，杜注，與魯異姓，蓋謂非我同姓，其心必有佗也。

讎者無時焉可與通。公羊傳（莊四年）

【按】通，相接也。言讎者無時可與之交，接禮記曲禮，父之讎弗與共戴天。

兄弟之讎不反兵，交遊之讎不同國。

父子之間不責善。孟子

【孫疏】言父子之間，不相責讓其善也。

責善朋友之道也。父子責善，賊恩之大者。孟子

【朱註】賊，害也。朋友當相責以善，父子行之，則害天性之恩也。

以上父子

兄弟鬩於牆，外禦其務。詩小雅左傳引之作外禦其侮（僖二十四年）

【毛傳】鬩，很也。【鄭箋】禦，禁務，侮也。兄弟雖內鬩而外禦侮也。【孔疏】兄

弟之親，不能相遠，言兄弟或有不相得，可鬩很於牆內，若他人來侵侮之，

則同心合意，外禦他人之侵侮。

豈無他人，不如我同父。詩唐風

【鄭箋】他人謂異姓也。

兄弟致美，救乏，賀善，弔災，祭敬，喪哀，情雖不同，毋絕其愛，親之道也。左傳魯惠伯引史佚語（文十五年）

【杜注】兄弟致美者，各盡其美，義乃終。【孔疏】祭敬者，謂助祭於兄弟之家，盡其敬也。喪哀者，謂兄弟死喪之事，竭其哀也。情雖不同，謂內相怨恨，雖不能和同，當無絕其愛，是相親之道也。

中也，養不中，才也。養不才，故人樂有賢父兄也。孟子

【朱註】無過不及之謂中，足以有爲之謂才。養謂涵育薰陶，俟其自化也。賢謂中而才者也。樂有賢父兄者，樂其終能成己也。

【按】原書下文中也，棄不中才也。棄不才，則賢不肖之相去，其間不能以寸，與此反覆相發。

仁人之於弟也，不藏怒焉，不宿怨焉，親愛之而已矣。孟子

【趙注】孟子言仁人於弟，不問善惡，親愛之而已。【孫疏】仁者之人，於其弟也，不藏怒心，不隔宿怨，但親愛之而已。

【朱註】藏怒，謂藏匿其怒，宿怨，謂留蓄其怨。

以上兄弟

男女居室，人之大倫也。孟子

君子之道，造端乎夫婦。禮記中庸

【按】易有天地，然後有萬物，有萬物然後有男女，有男女然後有夫婦，有夫婦然後有父子，有父子然後有君臣，有君臣然後有上下，有上下然後禮義有所錯，是夫婦爲人倫之始，故曰男女居室，人之大倫。又曰君子之道，造端乎夫婦，及其至也，察乎天地。

夫婦之道，不可以不久也。易序卦

【韓注】夫婦之道，以恒爲貴。

【按】恒，久也。恒象傳：婦人貞吉，從一而終，不久則有反目脫輻之凶矣。

昏（婚）姻之禮廢，則夫婦之道苦，而淫辟（僻）之罪多矣。禮記經解

妻者齊也，壹與之齊，終身不改。禮記郊特牲

【鄭注】齊謂共牢而食，同尊卑也。

【按】終身不改者，卽婦人貞吉從一而終之義也。

妻也者，親之主也，敢不敬與？子也者，親之後也，敢不敬與？禮記哀公問

【孔疏】妻也者，親之主也，言妻所以供粢盛祭祀，與親爲主，故云親之主也。

男女有別，然後父子親。禮記郊特牲

【陳註】有別，則一本而父子親。

男女同姓，其生不蕃。左傳鄭叔詹語（僖二十三年）

【杜注】蕃，息也。【孔疏】禮取妻不取同姓，辟（避）違禮而取，故其生子不能蕃息昌盛也。晉語曰：同姓不昏，懼不殖也。又曰：異姓則異德，異德則異類，異類雖近，男女相及，以生民也。同姓則同德，同德則同心，同心則同志，同志雖遠，男女不相及，畏續故也。黷則生怨，怨亂育災，災育滅姓，是故取辟同姓，畏亂災也。

女有家，男有室，無相瀆也，謂之有禮，易此必敗。

左傳魯申經語
(桓十八年)

【杜注】女安夫之家，夫安妻之室，違此則爲瀆，今公將姜如齊，故知其將致禍亂。

以上夫婦

師嚴然後道尊，禮記學記

【鄭注】嚴，尊敬也，尊師重道焉。

匪我求童蒙，童蒙求我，易蒙卦

【王注】童蒙之來求我，欲決所惑也。【孔疏】蒙者微昧闇弱之名，物皆蒙昧，唯願亨通，故云匪我求童蒙，童蒙求我者，物既闇弱，而意願亨通，即明者不求於闇，即匪我師德之高明，往求童蒙之闇，但闇者求明，明者不諮於闇，故云童蒙求我也。

禮聞來學，不聞往教。禮記曲禮

【鄭注】尊道藝。【孔疏】禮聞來學者，凡學之法，當就其師處，北面伏膺，不聞往教者，不可以屈師親來就己，故鄭云尊道藝也。

朋友攸攝，攝以威儀。詩大雅禮記左傳皆引之（襄三十一年）

【鄭注】攸所也，言朋友以禮儀相攝，正不以貧富貴賤之利也。（此注禮記文）

君子之接如水，小人之接如醴，君子淡以成，小人甘以壞。禮記表記
【鄭注】水相得合而已，酒醴相得，則敗，淡無酸酢，少味也，接或爲交。

【孔疏】君子之接如水者，言君子相接，不用虛言，如兩水相交，尋合而已。小人之接如醴者，小人以虛辭相飾，如似酒醴相合，必致敗壞，君子淡以成，小人甘以壞者，水相合爲江河，酒醴相合而久乃敗壞也。

善與人交，久而敬之。

論語

【程子曰】人交久則敬衰，久而能敬，所以爲善。

二人同心，其利斷金。

易繫辭

【孔疏】二人同心，其利斷金者，二人若同齊其心，其纖利能斷截於金，金是堅剛之物，能斷而截之，盛言利之甚也，此謂二人心行同也。

同聲相應，同氣相求。

易文言

【孔疏】同聲相應者，若彈宮而宮應，彈角而角動，是也。同氣相求者，若天欲雨而礎柱潤，是也。此二者聲氣相感也。

道不同，不相爲謀。

論語

【邢疏】此章言人之爲事，必須先謀，若道同者共謀，則情審不誤，若道不同而相爲謀，則事不成也。

【朱註】不同，如善惡、正邪之類。

益者三友，損者三友。友直，友諒，友多聞，益矣。友便辟，友善柔，友便佞，損矣。

論語

【朱註】友直則聞其過，友諒則進於誠，友多聞則進於明，便習熟也，便辟謂習於威儀而不直，善柔謂工於媚說而不諒，便佞謂習於口語而無聞見之實，三者損益正相反也。

輕絕貧賤而重絕富貴，則好賢不堅而惡惡不著也。人雖曰不利，吾不信也。

禮記緇衣

【鄭注】言此近微利也。【孔疏】以賢而貧賤則輕絕之，是好賢不堅，惡而富貴則重絕之，則惡惡不著也。如此者是貪利之人，故云雖曰不利，吾

不信也、

親者母失其爲親也、故者母失其爲故也、禮記檀弓

【孔疏】此節論無大故不遺故舊之事、言與我骨肉親者、雖有非禮、無失其爲親之道、尙得與之和睦、故舊者雖有非禮、無失其爲故之道、尙得往來、

里仁爲美、論語

【朱註】里有仁厚之俗爲美、

非宅是卜、惟鄰是卜、左傳齊晏子引諺（昭三年）

鄉里同井、出入相友、守望相助、疾病相扶持、孟子

【趙注】同鄉之田、同井之家、各相營勞也、出入相友、相友耦也、周禮太宰曰、八曰友以任得民、守望相助、助察奸惡也、疾病相扶持、扶持其羸弱、救其困急、所以教民相親睦之道也、

【朱註】同井者八家也，友猶伴也，守望，防寇盜也。

以上師友鄉里

君使臣以禮，臣事君以忠，論語

【朱註】二者皆理之當然，各欲自盡而已，呂氏曰，使臣不患其不忠，患禮之不至，事君不患其無禮，患忠之不足。

故將大有爲之君，必有所不召之臣，孟子

【趙注】言古之大聖大賢有所興爲之君，必就大賢臣而謀事，不敢召也。

王者師臣，霸者友臣也。

進人以禮，退人以禮，禮記檀弓

【按】孟子齊宣王問孟子云，禮爲舊君有服，何如斯可爲服矣，孟子對曰，諫行言聽，膏澤下於民，有故而去，則君使人導之出疆，又先於其所往，去三年不反，然後收其田里，此之謂三有禮焉，如此則爲之服矣，與檀弓此

節論反服正同，言聽計從，此所謂進人以禮也，導之出疆，三年然後收田里，所謂退人以禮也。

毋以小謀大，毋以遠言近，毋以內圖外。

禮記緇衣

【陳註】人君不使小臣謀大臣，則大臣不至於怨乎，不以不使遠臣間近臣，則近臣不至於疾其君，不使內之寵臣圖四方宣力之士，則遠臣之賢無所壅蔽，而得見知於上矣。

王臣蹇蹇，匪躬之故。

易蹇卦

【朱註】柔順中正，正應在上，而在險中，故蹇而又蹇，以求濟之，非以其身之故也，不言吉凶者，占者但當鞠躬盡力而已，至於成敗利鈍，則非所論也。

【按】彖曰，蹇難也，險在前也。

事君難進而易退。

禮記表記

【孔疏】難進謂君擇已，易退謂君厭已。

君子之事君也，務引其君以當道。孟子

【朱註】當道謂事合於理。

所謂大臣者，以道事君，不可則止。論語

【朱註】以道事君者，不從君之欲，不可則止者，必行己之志。

邦有道，貧且賤焉，恥也；邦無道，富且貴焉，恥也。子語

【朱註】世治而無可行之道，世亂而無能守之節，碌碌庸人，不足以爲士矣，可恥之甚也。

責難於君，謂之恭；陳善閉邪，謂之敬；吾君不能謂之賊。孟子

【范氏曰】人臣以難事責於君，使其君爲堯舜之君者，尊君之大也；開陳善道，以禁閉君之邪心，惟恐其君或陷於有過之地者，敬君之至也；謂其君不能行善道而不以告者，賊害其君之甚也。

彼君子兮，不素餐兮。詩魏風

【鄭箋】素，空也。餐，食也。彼君子者，仕有功，乃肯受祿。

守道不如守官。左傳引仲尼語（昭二十年）

【原文】齊侯田于沛，招虞人以弓，不進，公使執之，辭曰：昔我先君之田也，旃以招大夫，弓以招士，皮冠以招虞人，臣不見皮冠，故不敢進，乃舍之。仲尼曰：守道不如守官，君子韙之。

【杜注】君召當往，道之常也，非物不進，官之制也。

公事有公利，無私忌。左傳魯惠伯語（昭三年）

【杜注】忌，怨也。【孔疏】檀弓云：子夏請問居昆弟之仇如之何，曰：仕不與共國，衛君命而使，雖遇之不鬪。鄭玄云：爲負而廢君命也，故有公利無私忌。

有官守者，不得其職，則去；有言責者，不得其言，則去。孟子

【趙注】官守、居官守職者、言責、獻言之責、諫諍之官也、孟子言人臣居官不得守其職、諫正君不見納者、皆當致仕而去、

事君不辟（避）難、有罪不逃刑、

左傳晉羊舌赤稱魏絳語（襄三年）

【原文】晉侯之弟揚干亂行於曲梁、魏絳戮其僕、晉侯怒、謂羊舌赤曰、合諸侯以爲榮也、揚干爲戮、何辱如之、必殺魏絳、無失也、對曰、絳無貳志、事君不辟（避）難、有罪不逃刑、

【孔疏】此言絳之宿心舊行耳、服虔云、謂敢斬揚干之僕、是不辟獲死之難、然則斬僕信依法也、豈是絳之罪、而得謂之有罪不逃刑乎、

【按】原絳之意、蓋謂斬僕原不辟獲死之難、故云事君不辟難、即以此獲罪於君、亦不逃刑、故云有罪不逃刑、服氏之說似近迂拘、

內亂不與焉、外患弗辟（避）也、

禮記雜記

【鄭注】謂卿大夫也、同僚將爲亂、已力不能討、不與而已、至於隣國爲寇、

則當死之也、

以上君臣

第五類 禮本 二十四則

壞國、喪家、亡人、必先去其禮、

禮記禮運

【鄭注】言愚者之反聖人也、【孔疏】此論禮爲治理之本、故禮不可去、

以舊坊爲無所用而壞之者、必有水敗、以舊禮爲無所用而去之者、必有亂患、

禮記經解

【孔疏】以舊坊爲無所用而壞之者、必有水敗者、譬言舊禮不可去也、坊以止水、忽有無知之人、謂舊坊爲無所用而壞之、坊壞則水必來、敗於產業也、以舊禮爲無所用而去之者、必有亂患者、禮本防亂、忽有愚人、謂舊禮爲無所用而壞去之者、則必有亂患之事也、

君子行禮，不求變俗。禮記曲禮

【鄭注】求，務也。不務變其故俗，重本也。

禮時爲大。禮記禮器

【陳註】時者，天之所爲，故爲大。堯舜湯武之事不同者，各隨其時耳。聖王受命得天下，必定一代之禮制，或因或革，各隨時宜，故云時爲大也。

禮從宜，使從俗。禮記曲禮

【鄭注】事不可常也。

【呂氏曰】敬者禮之常，禮時爲大，時者禮之變，體常盡變，則達之天下，周旋無窮。

昔先王之制禮也，因其財物而致其義焉爾。禮記禮器

【陳註】財物，幣玉牲牢黍稷之類，無財無物，不可以行禮，故先王制禮，必因財物而致其用之之義焉。

貧者不以貨財爲禮，老者不以筋力爲禮。

禮記曲禮

【應氏曰】無財不可以爲悅，而財非貧者之所能辦，非強有力者不足以行禮，而強有力非老者之所能勉。

禮者因人之情，而爲之節文，以爲民坊者也。

禮記坊記

【方氏曰】小人無道以安貧，故貧斯約，無德以守富，故富斯驕，約者不獲恣，則有羨彼之志，故約斯盜，驕者不能遜，則有犯上之心，故驕斯亂，凡此皆人之情也，而禮因爲之節文，若家富不過百乘，所以制富而不使之驕也，一夫受田百畝，所以制貧而不使之約也，伐冰之家，不畜牛羊，所以制貴而不使之慊也。

恭敬者幣之未將者也，恭敬而無實，君子不可虛拘。

孟子

【朱註】將猶奉也，詩曰承筐是將，程子曰，恭敬雖因威儀幣帛而後發見，然幣之未將時，已有此恭敬之心，非因幣帛而後有也，恭敬而無實，言當

時諸侯之待賢者，特以幣帛爲恭敬而無其實也，拘留也。

禮與其奢也寧儉，喪與其易也寧戚。論語

【何注】包曰：易和易也，言禮之本意，失於奢不如儉，喪失於和易不如哀戚。

【朱註】易，治也。孟子曰：易其田疇，在喪禮則節文習熟而無哀痛慘怛之實者也。戚則一於哀而文不足耳。禮貴得中，奢易則過於文，儉戚則不及而質，二者皆未合禮。然凡物之理，必先有質而後有文，則質乃禮之本也。

昏禮者，將合二姓之好，上以事宗廟，而下以繼後世也。禮記昏義

【孔疏】謂之昏者，娶妻之禮，以昏爲期，因以名焉。必以昏者，取陽往陰來之義。

啜菽飲水，盡其歡，斯之謂孝。歛手足形，還葬而無槨，（槨）稱其財，

斯之謂禮。禮記檀弓

【陳註】世固有三牲之養而不能歡者，亦有厚葬以爲觀美而不知陷於僭禮之罪者，知此則孝與禮可得而盡矣，又何必傷其貧乎，還葬謂斂畢即葬，不殯而待月日之期也。

三年之喪，雖貴遂服。

左傳晉叔向語（昭十五年）

【杜注】天子諸侯除喪當在卒哭，今王既葬而除，故議其不遂。【孔疏】遂猶申也，竟也，其意言三年之喪，雖貴爲天子，猶當申遂其服，使終日月，乃是禮也。

父母之喪，無貴賤一也。

禮記中庸

【朱註】父母之喪，上下同之，推己以及人也。

有服，人召之，食不往，大功以下，既葬適人，人食之，其黨也，食之，非其黨，弗食也。（禮記雜記）

【鄭注】往而見食，則可食也，爲食而往則不可，黨猶親也，非親而食，則是

食於人無數也。

【按】大功、五服之一、九月之喪服也。

之死而致死之不仁、而不可爲也、之死而致生之不知（智）而不

可爲也。

禮記檀弓

【劉氏曰】之、往也、之死、謂以禮往送於死者也、往於死者、而極以死者之禮待之、是無愛親之心爲不仁、故不可行也、往於死者而極以生者之禮待之、是無燭理之明爲不知（智）故亦不可行也、此先王所以爲明器以送死者、不致死、亦不致生、而以有知無知之間待死者、故備物而不可用也、備物則不致死、不可用則亦不致生。

【按】所謂明器、猶今所謂冥物也、雲麓漫鈔、古之明器、神明之也、今以紙爲之、謂冥器、錢曰冥財、冥之爲言、本於漢武紀用冥羊馬、不若用明字爲近古云。

喪從死者，祭從生者。禮記王制

【陳註】中庸曰：父爲大夫，子爲士，葬以大夫，祭以士；父爲士，子爲大夫，葬以士，祭以大夫，蓋葬用死者之爵，祭用生者之祿，與此意同。

賓禮每進以讓，喪禮每加以遠。禮記坊記

【孔疏】賓禮每進以讓者，按鄉飲酒禮，主人迎賓，至門三辭，至階三讓，皆主人先入先登，是賓禮每進以讓，送喪漸遠，弔哭有節，示民不僭之事。

【陳註】賓自外而入，其禮不可以不讓，喪自內而出，其禮不容於不遠，其進其加，皆以漸致，禮之道也。

喪禮與其哀不足而禮有餘也，不若禮不足而哀有餘也；祭禮與其敬不足而禮有餘也，不若禮不足而敬有餘也。禮記檀弓

【孔疏】此節論喪主哀祭主敬之事，喪禮有餘，明器衣衾之屬多也，言居喪哀少而禮物多，則不如物少而哀多也；祭祀之禮有餘，謂俎豆牲牢之

屬多也，言敬少而牢多，則不如牲器少而敬多也。

喪三日而殯，凡附於身者，必誠必信，勿之有悔焉耳矣。三月而葬，凡附於棺者，必誠必信，勿之有悔焉耳矣。喪三年以爲極，亡則弗之忘矣。故君子有終身之憂，而無一朝之患，故忌日不樂。

禮記檀弓

【陳註】附於身者，襲斂衣衾之具，附於棺者，明器用器之屬也。必誠，謂於死者無所欺，必信，謂於生者無所疑。喪莫重於三年，既葬曰亡，中庸曰，事亡如事存，雖已葬而不忘其親，所以爲終身之憂，而忌日不樂也。祭義曰，君子有終身之喪，忌日之謂也。冢宅崩毀，出於不意，所謂一朝之患，惟其必誠必信，故無一朝之患也。

【按】鄭註忌日謂死日，言忌日不用舉吉事。

祭如在，祭神如神在，子曰，吾不與祭如不祭。

論語

【何注】祭如在者，言事死如事生，祭神者，謂祭百神也，吾不與祭如不祭。

者，孔子或出或病，而不自親祭，使攝者爲之，不致肅敬於心，與不祭同。

【朱註】范氏曰：君子之祭，七日戒，七日齋，必見所祭者，誠之至也。是故郊則天神格，廟則人鬼享，皆由己以致之也。有其誠則有其神，無其誠則無其神，可不謹乎？吾不與祭如不祭，誠爲實，禮爲虛也。

祭不欲數，數則煩，煩則不敬，祭不欲疏，疏則怠，怠則忘。

禮記祭義

【鄭注】忘與不敬，違禮莫大焉。合於天道，因四時之變化，孝子感時念親，則以此祭之也。

祭者薦其時也，薦其敬也，薦其美也，非享味也。

穀梁傳（成十七年）

【按】薦進也，獻也。

夫聖王之制祭祀也，法施於民則祀之，以死勤事則祀之，以勞定

國則祀之，能禦大菑（災）則祀之，能捍大患則祀之。

禮記祭法

【孔疏】法施於民則祀之者，若神農及后土，帝嚳與堯及黃帝顓頊與契

之屬是也，以死勤事則祀之者，若舜及鯀冥是也，以勞定國則祀之者，若禹是也，能禦大畜及能捍大患則祀之者，若湯及文武是也。

【按】法施於民，若神農殖百穀之類，以死勤事，若舜勤衆事而野死之類，以勞定國，若禹脩絲功鄩鴻水之類，能禦大畜，捍大患，若湯之除虐，文武之去災是也，具見經下文。

第六類 政符 四十六則

親仁善隣，國之寶也。左傳陳五父語（隱六年）

【原文】鄭伯請成于陳，陳侯不許，五父諫曰：親仁善隣，國之寶也，君其許鄭。

【按】親仁者，有仁德者能親而友之，交好曰善，善隣者交好於隣邦也，救災恤隣，道也。左傳秦百里奚語（僖十三年）

【按】振貧乏曰恤。

在知人，在安民。書皋陶謨

【孔傳】修身親親之道，在知人所信任，在能安民。【孔疏】人君行此道者，在知人善惡，擇善而信任之，在於能安下民，爲政以安定之也。

有國有家者，不患寡而患不均，不患貧而患不安，蓋均無貧，和無寡，安無傾。論語

【何注】國，諸侯；家，卿大夫。不患寡而患不均者，不患土地人民之寡少，患政理之不均平，不患貧而患不安者，憂不能安民耳。民安則國富，均無貧，和無寡，安無傾者，政教均平則不患貧矣，上下和同，不患寡矣，大小安寧，不傾危矣。

【朱註】寡謂民少，貧謂財乏，均謂各得其分，安謂上下相安。季氏之欲取顓臾，患寡與貧耳，然是時季氏據國，而魯公無民，則不均矣，君弱臣強，互

生嫌隙，則不安矣。均則不患於貧而和，和則不患於寡而安。安則不相疑忌，而無傾覆之患。

師克在和不在衆

左傳楚鬬廉語（桓十一年）

【按】原文師克在和不在衆，商周之不敵，君之所聞也。杜注，商，紂也。周，武王也。傳曰，武王有亂臣十人，紂有億兆夷人。孔疏引尙書太誓曰，受有億兆夷人，離心離德。予有亂臣十人，同心同德。是和即同心同德之謂。言行軍制勝之道，在於同心同德，不在於士卒之衆多也。

爲政者不賞私勞，不罰私怨

左傳魯仲尼引周任語（昭五年）

【按】勞，功勞也。

名不正則言不順

論語

【朱註】名不當其實，則言不順。名實相須，一事苟，則其餘皆苟矣。唯器與名不可以假人。左傳魯仲尼語（成二年）

【杜注】器、車服、名、爵號、【孔疏】唯車服之器、與爵號之名、不可以借也、末大必折、尾大不掉、左傳楚申無宇語（昭十一年）

【孔疏】末大必折、以樹喻也、尾大不掉、以畜獸喻也、若體性焉、自首領股肱、至於拇指毛脉、大能掉小、反之則不能掉也、

作事威克其愛、雖小必濟、

左傳吳公子光述聞（昭二十三年）

【杜注】克勝也、軍事尙威、【孔疏】尙書胤征云、威克厥愛、允濟、愛克厥威、允罔功、是古有此言、

【按】孔傳言能以威勝所愛、則必有成功、以愛勝威、無以濟衆、信無功、孔疏云、言威嚴能勝其愛心、有罪者雖愛必誅、信有成功、若愛心勝其威嚴、親愛者有罪不殺、信無功矣、以上諸語、可移以註此、濟、成功也、言其力雖小、必有成功也、

無威則驕、驕則亂生、亂生必滅、所以亡也、

左傳宋子罕語（襄二十七年）

【按】此爲小國言，無威者，謂大國不以兵威小國也，無威則驕者，謂不以兵威之，則不知畏而驕也。

夫火烈，民望而畏之，故鮮死焉；水懦弱，民狎而翫之，則多死焉，故

寬難。左傳：鄆子產語（昭二十年）

【杜注】狎，輕也，難，難以治也。

民之多幸，國之不幸也。左傳：晉羊舌職引諺（宣十六年）

【原文】晉侯請于王，戊申，以黻冕命士會將中軍，且爲大傅，於是晉國之盜，逃奔于秦。羊舌職曰：吾聞之，禹稱善人，稱舉也不善人遠，此之謂也。夫詩曰：戰戰兢兢，如臨深淵，如履薄冰，善人在上也，善人在上，則國無幸民。諺曰：民之多幸，國之不幸也，是無善人之謂也。

【按】幸，幸免也，言民多幸免者，國之不幸也。

人惟求舊。書盤庚引遯任語

【孔傳】言人貴舊，器貴新。

【蘇氏曰】人舊則習，器舊則敝。

雖有絲麻，無弃菅蒯，雖有姬姜，無弃蕉萃，凡百君子，莫不代匱。

左傳引逸

詩（成九年）

【杜注】逸詩也，姬姜大國之女，蕉萃陋賤之人。【孔疏】釋草云，白華野菅，菅似茅，蒯與菅連，亦茅之屬，並可代絲麻之乏，故云無弃也。

【按】代匱者言匱乏之時，可備以代之也。

君子不以言舉人，不以人廢言。

論語

【何注】有言者不必有德，故不以言舉人，不可以無德而廢善言，故云不以人廢言。

用其道不弃其人。

左傳君子語（定九年）

【按】此句與不以言舉人句義似相反，然既云用其道，則其人有德可知。

用其道不弃其人，實與賦納以言，明試以功，車服以庸之義相合。

父子兄弟罪不相及。

左傳齊苑何忌引康誥語（昭二十年）

【孔疏】刑不慈者，不可刑其父，又刑其子，刑不孝者，不可刑其子，又刑其父，是爲父子兄弟罪不相及。

與其殺不辜，寧失不經。

左傳楚聲子引夏書語（襄二十六年）

君子信而後勞其民，未信則以爲厲已也。信而後諫，未信則以爲謗已也。

論語

【朱註】信謂誠意惻怛而人信之也，厲猶病也，事上使下，必皆誠意交孚，而後可以有爲。

說（悅）以先民，民忘其勞，說以犯難，民忘其死。

易彖象

【孔疏】先以說豫撫民，然後使之從事，則民皆竭力忘其從事之勞，故曰說以先民，民忘其勞也，先以說豫勞民，然後使之犯難，則民皆授命忘其

犯難之死，故曰說以犯難，民忘其死也。

以佚道使民，雖勞不怨，以生道殺民，雖死不怨殺者。孟子

【程子曰】以佚道使民，謂本欲佚之也，播穀乘屋之類是也，以生道殺民，謂本欲生之也，除害去惡之類是也，蓋不得已而爲所當爲，則雖拂民之欲而民不怨，其不然者反是。

民之爲道也，有恒產者有恒心，無恒產者無恒心。孟子

【趙注】恒常也，產生也，恒產，則民常可以生之業也，恒心，人常有善心也，凡民迫於飢寒，則不能守其常善之心。

樂民之樂者，民亦樂其樂，憂民之憂者，民亦憂其憂。孟子

【趙注】言民之所樂，君與之同，故民亦樂使其君有樂也，民之所憂者，君亦助之憂，故民亦能憂君之憂，爲之赴難也。

無欲速，無見小利。論語

【朱註】欲事之速成，則急遽無序，而反不達，見小者之爲利，則所就者小，而所失者大矣。

苦節不可貞，易節卦

【孔疏】節須得中爲節，過苦傷於刻薄，物所不堪，不可復正，故曰苦節不可貞也。

屯其膏，小貞吉，大貞凶，易屯卦

【朱註】九五雖以陽剛中正居尊位，然當屯之時，陷於險中，雖有六二正應，而陰柔才弱，不足以濟，初九得民於下，衆皆歸之，九五坎體，有膏潤而不得施，爲屯其膏之象，占者以處小事，則守正猶可獲吉，以處大事，則雖正而不免於凶。

猶之與人也，出納之吝，謂之有司，論語

【朱註】猶之，猶言均之也，均之以物與人，而於其出納之際，乃或吝而不

果，則是有司之事，而非爲政之體，所與雖多，人亦不懷其惠矣。項羽使人，有功當封，刻印刻，忍弗能予，卒以取敗，亦其驗也。

衆怒難犯，專欲難成。

左傳鄒子產語（襄十年）

【按】傳云，衆怒如水火焉，不可爲謀，故曰衆怒難犯，專欲，猶云一意孤行也，違衆不祥，故曰專欲難成。

以欲從人，則可以人從欲，鮮濟。

左傳魯臧文仲語（僖二十年）

【杜注】以欲從人者，屈己之欲，從人之善也。

求逞於人，不可與人同欲，盡濟。

左傳鄒子產語（昭四年）

【杜注】逞，快也。求人以快意，人必違之。

無欲實難，皆得其欲，以從其事，而要其成。

左傳鄒子產語（襄三十年）

【杜注】無欲實難，言人不能無欲。

【按】皆得其欲，以從其事，而要其成，與前云與人同欲盡濟，義同。

爲政不難，不得罪於巨室。孟子

【趙注】巨室，大家也，謂賢卿大夫之家，人所則效者，言不難者，但不使巨室罪之則善也。

安定國家，必大焉先。左傳 鄒子產引鄒書（襄三十年）

【杜注】先和大族而後國家安。

【按】此與孟子爲政不難，不得罪於巨室，義相同。

夫有大功而無貴仕，其人能靖者與有幾。左傳 楚子文語（僖二十三年）

【杜注】貴仕，貴位也，言必矜功爲亂，不可不賞。

用人之知（智）去其詐，用人之勇去其怒，用人之仁去其貪。禮記

【鄭注】詐者害民信，怒者害民命，貪者害民財，三者亂之原。【孔疏】用人之知去其詐者，知謂謀計，曉達前事，詐者不敢爲之，故云去其詐。用人之勇去其怒者，勇謂果敢決斷，能除惡人凶暴，怒者不敢爲之，故云去其

怒，用人之仁去其貪者，仁者好施，不苟求其財，貪者見之心慚止息，故云去其貪也。

【陳註】言人君用人，當取其所長，舍其所短。

好勇疾貧，亂也。人而不仁，疾之已甚，亂也。論語

【何注】好勇之人而患疾已貧賤者，必將爲亂，疾惡太甚，亦使其爲亂。

【朱註】好勇而不安分，則必作亂，惡不仁之人，而使之無所容，則必致亂，二者之心，善惡雖殊，然其生亂則一也。

巧言亂德，小不忍，則亂大謀。論語

【朱註】巧言變亂是非，聽之使人喪其所守，小不忍，如婦人之仁，匹夫之勇，皆是。

幾事不密則害成。易繫辭

【孔疏】幾謂幾微之事，當須密慎，預防禍害，若其不密而漏泄，禍害交起。

是害成也。

君子屢盟，亂是用長。

左傳引之（桓十二年）

【鄭箋】凡國有疑，會同則用盟而相要也。屢數也。盟之所以數者，由世衰亂，多相背違。時見曰會，殷見曰同。非此時而盟謂之數。

【杜注】詩小雅言無信，故數盟。數盟則情疏，情疏而憾結，故云長亂。

謀夫孔多，是用不集。

詩小雅左傳引之（襄八年）

【毛傳】集就也。【鄭箋】謀事者衆，而非賢者，是非相奪，莫適可從，故所爲不成。

【杜注】孔，甚也。集，就也。言人欲爲政，是非相亂而不成。

國家將亡，必多制。

左傳晉叔向語（昭六年）

【杜注】數，改法。

國家之敗，由官邪也。官之失德，寵賂章也。

左傳魯臧哀伯語（桓二年）

【按】言國家之敗壞，由於百官之違邪，百官之所以違邪，由於寵臣之受賄賂，章明而無所忌憚也。

易窮則變，變則通，通則久。

易繫辭

【王注】通變則無窮，故可久也。【孔疏】所以通其變者，言易道若窮，則須隨時改變，所以須變者，變則開通得久長，故云通則久也。

雖有智慧，不如乘勢，雖有鎡基，不如待時。

孟子引齊人語

【趙注】齊人諺言也，乘勢居富貴之勢，鎡基田器，耒耜之屬，待時三農時也。

道之貴者時，其行勢也。

穀梁傳（僖二十二年）

【范氏集解】道有時，事有勢，何貴於道，貴合於時，何貴於時，貴順於勢。

第七類

人鑑 二十八則

衆惡之、必察焉、衆好之、必察焉、論語

【何注】王曰、或衆阿黨比周、或其人特立不羣、故好惡不可不察也、

【朱註】楊氏曰、惟仁者能好惡人、衆好惡之而不察、則或蔽於私矣、

觀近臣以其所爲主、觀遠臣以其所主、孟子

【朱註】近臣、在朝之臣、遠臣、遠方來仕者、君子小人各從其所類、故觀其

所爲主、與其所主者、而其人可知、

聽其言也、觀其眸子、人焉廋哉、孟子

【朱註】眸子、目瞳子也、廋、匿也、言亦心之所發、故并此以觀、則人之邪正、

不可匿矣、然言猶可以僞爲、眸子則有不容僞者、

巧言令色、鮮矣仁、論語

【何注】包曰、巧言、好其言語、令色、善其顏色、皆欲令人說之、少能有仁也、

【朱註】巧、好、令、善也、好其言、善其色、致飾於外、務以悅人、則人欲肆而本

心之德亡矣，聖人詞不迫切，專言鮮，則絕無可知，學者所當深戒也。程子曰：知巧言令色之非仁，則知仁矣。

剛毅木訥近仁，論語

【何注】王曰：剛無欲，毅果敢，木質樸，訥遲鈍，有斯四者近於仁。

【朱註】程子曰：木者質樸，訥者遲鈍，四者質之近乎仁者也。楊氏曰：剛毅則不屈於物欲，木訥則不至於外馳，故近仁。

開國承家，小人勿用，易師卦

【王注】開國承家，以寧邦也，小人勿用，非其道也。【孔疏】言若其功大，使之開國爲諸侯，若其功小，使之承家爲卿大夫，小人勿用者，言開國承家，須用君子，勿用小人也。

瑣瑣姻亞，則無廡仕，詩小雅

【毛傳】瑣瑣小貌，兩壻相謂曰亞，廡厚也。【鄭箋】壻之父曰姻，瑣瑣昏姻。

妻黨之小人，無厚任用之，置之大位，重其祿也。

君子不可小知，而可大受也；小人不可大受，而可小知也。

論語

【何注】王曰：君子之道深遠，不可小了知，而可大受；小人之道淺近，可小了知，而不可大受也。

【朱註】此言觀人之法，知我知之也，受彼所受也。蓋君子於細事未必可觀，而才德足以任重，小人雖器量淺狹，而未必無一長可取。

君子求諸己，小人求諸人。

論語

【何注】君子責己，小人責人。【皇疏】求責也，君子自責己德行之不足，不責人也。【劉氏正義】禮中庸云：君子素位而行，不願乎其外。又云：正己而不求於人，則無怨，上不怨天，下不尤人。中論子思曰：事自名也，聲自呼也，貌自眩也，物自處也，人自官也，無非自己者，故怨人謂之壅，怨己謂之通，通也知所悔，壅也遂所誤。

【朱註】謝氏曰：君子無不反求諸己，小人反是。此君子小人所以分也。

君子喻於義，小人喻於利。

論語

【何注】孔曰：喻，猶曉也。【皇疏】：喻，曉也。君子所曉於仁義，小人所曉於財利。故范甯曰：棄貨財而曉仁義，則爲君子；曉富利而棄仁義，則爲小人。【劉氏正義】：包氏溫故錄、大雅、如賈三倍，君子是識。箋云：賈物有三倍之利者，小人之所宜知也。君子知之，非所宜也。孔子曰：君子喻於義，小人喻於利。如鄭說，則論語此章爲卿大夫之專利也。而發：君子小人以位言。董子對策曰：古之所予祿者，不食於力，不動於末，故利可均布，而民可家足。公儀子相魯，見其家織帛，怒而出其妻，食於舍而茹葵，怒而拔其葵，曰：我已食祿，又奪園夫紅女利乎。夫皇皇求財利，常恐匱乏者，庶人之意也。皇皇求仁義，常恐不能化民者，大夫之意也。觀此可知鄭說之約而該矣。荀子：古者雖王公卿士大夫之子孫，不能屬於禮義，則歸之庶人。雖庶人

之子、積文學、正身行能、則歸之卿士大夫、案卿士大夫君子也、庶人小人也、貴賤以禮義分、故君子小人以貴賤言、即以能禮義不能禮義言、能禮義故喻於義、不能禮義故喻於利、無恒產而有恒心者、惟士爲能、君子喻於義也、若民則無恒產、因無恒心、小人喻於利也、儒者知義利之辨、舍利不言、可以自守、因民之所利而利之、教必本富、乃可以治小人、故孔子此言、正欲君子之治小人者、知小人喻於利、

【朱註】喻曉也、義者天理之所宜、利者人情之所欲、程子曰、君子之於義、猶小人之於利、唯其深喻、是以篤好、楊氏曰、君子有舍生而取義者、以利言之、則人之所欲無甚於生、所惡無甚於死、孰肯舍生而取義哉、其所喻者義而已、不知利之爲利故也、小人反是、

君子坦蕩蕩、小人長戚戚、論語

【何注】鄭曰、坦蕩蕩、寬廣貌、長戚戚、多憂懼貌、【皇疏】君子坦蕩蕩者、

內省不疚故也。小人長戚戚者，好爲罪過，故恒懷憂懼也。江熙曰：君子坦爾夷任，蕩然無私，小人馳競於榮利，耿介於得失，故長爲愁府也。

【朱註】坦，平也。蕩蕩寬廣貌。程子曰：君子循理，故常舒泰，小人役於物，故多憂戚。又曰：君子坦蕩蕩，心廣體胖。

君子之過也，如日月之食焉。過也，人皆見之；更也，人皆仰之。

論語

【何注】更改也。【邢疏】此論君子之過，如日月之食，更改也。言君子苟有過也，爲衆所知，如日月正當食時，則萬物皆觀也。及其改過之時，則人皆復仰其德，如日月明生之後，則萬物亦皆仰其明。【按】此與孔子過則勿憚改之言互相發明。

小人之過也，必文。

論語

【何注】孔曰：文飾其過，不言其情實也。【皇疏】君子有過，是已誤行，非故爲也，故知之則改，而小人有過，是知而故爲，故愈文飾之，不肯言己非。

也。

【朱註】文飾之也，小人憚於改過，而不憚於自欺，故必文以重其過。

君子易事而難說也，說之不以道，不說也；及其使人也，器之；小人難事而易說也，說之雖不以道，說也；及其使人也，求備焉。

論語

【何注】孔曰，不責備於一人，故易事；器之者，度才而官之。

【朱註】器之，謂隨其材器而使之也；君子之心公而恕，小人之心私而刻，天理人欲之間，每相反而已矣。

君子成人之美，不成人之惡，小人反是。

論語

【邢疏】此章言君子之於人，嘉善而矜不能，又能仁恕，故成人之美，不成人之惡也；小人則嫉賢樂禍，而成人之惡，不成人之美，故曰反是。

【朱註】成者，誘掖獎勸以成其事也；君子小人，所存既有厚薄之殊，而其所好又有善惡之異，故其用心不同如此。

君子居易以俟命，小人行險以徼幸。禮記中庸

【鄭注】易猶平安也。俟命，聽天命也。險，謂傾危之道。【孔疏】言君子以道自處，恒居平安之中，以聽待天命。小人以惡自居，恒行險難傾危之事，以徼求榮幸之道。論語曰：不可以久處約，是也。

君子可欺以其方，難罔以非其道。孟子

【趙注】方，類也。君子可以事類欺。

【朱註】方，亦道也。罔，蒙蔽也。欺以其方，謂誑之以理之所有，罔以非其道，謂昧之以理之所無。

君子之道，闇然而日章，小人之道，的然而日亡。禮記中庸

【鄭注】言君子深遠難知，小人淺近易知。【孔疏】章，明也。言君子以其道德深遠謙退，初視未見，故曰闇然。其後明著，故曰日章明也。小人好自矜大，故初視時的然，以其才藝淺近，後無所取，故曰日益亡。

女德無極，婦怨無終。

左傳周富辰語（僖二十四年）

【杜注】婦女之志，近之則不知止足，遠之則忿怒無已，終猶已也。

牝鷄之晨，維家之索。

書牧誓

【孔傳】晨，晨鳴，索，盡也。喻婦人知外事，雌代雄鳴，則家盡，婦奪夫政，則國亡。

婦有長舌，維厲之階。

詩大雅

【鄭箋】長舌，喻多言語，是王降大厲之階，階，所由上下也。

小懲而大誡，此小人之福也。

易繫辭

【孔疏】明小人之道，不能恒善，若因懲誡而得福也。

德薄而位尊，知小而謀大，力小而任重，鮮不及矣。

易繫辭

【孔疏】言不能安身，知小謀大而遇禍。

負且乘，致寇至。

易解卦

【王注】處非其位，履非其正，以附於四，用夫柔邪以自媚者也。乘二負四，以容其爲，寇之來也，自己所致，雖幸而免，正之所賤也。

【按】繫辭，易曰：負且乘，致寇至，負也者，小人之事也，乘也者，君子之器也，小人而乘君子之器，盜思奪之矣。孔疏謂擬議之道，當量身而行，不可以小處大，以賤貪貴，故引解卦六三以明之也。

所謂故國者，非謂有喬木之謂也，有世臣之謂也。孟子

【趙注】故者，舊也，喬高也，人所謂是舊國也者，非但見其高大樹木也，當有累世修德之臣，常能輔其君以道，乃爲舊國可法則也。

方叔元老，克壯其猶。詩小雅

【毛傳】方叔，卿士也，元大也，五官之長，出於諸侯，曰天子之老，壯大，【鄭箋】猶，謀也，謀，兵謀也。

雖無老成人，尙有典刑。詩大雅

【鄭箋】老成人謂若伊尹伊陟臣扈之屬，雖無此臣，猶有常事故法可案用也。

人之云亡，邦國殄瘁。

詩大雅左傳引之（文六年）

【毛傳】殄盡，瘁病也。【鄭箋】賢人皆言奔亡，則天下邦國將盡困窮。

第八類 勸學 十四則

好學近乎知，（智）力行近乎仁，知恥近乎勇。

禮記中庸

【朱註】此言未及乎達德，而求以入德之事。呂氏曰：愚者自是而不求，自私者殉人欲而忘返，懦者甘爲人下而不辭，故好學非知，然足以破愚，力行非仁，然足以忘私，知恥非勇，然足以起懦。

飽食煖衣，逸居而無教，則近於禽獸。

孟子

【孫疏】言飽食而煖衣，逸樂居處而無以教之，則近類於禽獸，以其不知

高下也。

聖達節，次守節，下失節。左傳曹子臧引前志語（成十五年）

【杜注】聖達節者，聖人應天命，不拘常禮，次守節，謂賢者，下失節，愚者妄動。

大上有立德，其次有立功，其次有立言，雖久不廢，此之謂不朽。左傳魯叔

孫豹述古語（襄二十四年）

【杜注】立謂不廢絕，【孔疏】立德，謂創制垂法，博施濟衆，聖德立於上，代，惠澤被於無窮，立功，謂拯危除難，功濟於時，立言，謂言得其要，理足可傳，其身既歿，其言尚存，此三者雖經世代，當不朽腐，故穆子歷言之。

君子以多識前言往行，以畜其德。易大畜大象傳

【王注】物之可畜於懷，令德不散盡於此也，【孔疏】君子則此大畜，物既大畜，德亦大畜，故多記識前代之言，往賢之行，使多聞多見，以畜積已

德故云以畜其德也。

君子學道則愛人，小人學道則易使也。

論語

【朱註】君子小人以位言之，言君子小人皆不可以不學。

君子有三患，未之聞，患弗得聞也；既聞之，患弗得學也；既學之，患弗能行也。

禮記雜記

【孔疏】此君子謂在位之君子，未聞患弗得聞也者，言人須多聞多識，若未聞知古事，恒憂患不得聞也。

詩書義之府也，禮樂德之則也，德義利之本也。

左傳晉趙衰語
(僖二十七年)

【孔疏】詩之大旨，勸善懲惡，書之爲訓，尊賢伐罪，奉上以道，禁民爲非之謂義，詩書義之府藏也，禮者謙卑恭謹，行歸於敬，樂者欣喜歡娛，事合於愛，揆度於內，舉措得中之謂德，禮樂者德之法則也，心說禮樂，志重詩書，遵禮樂以布德，習詩書以行義，有德有義，利民之本也。

博學之、審問之、慎思之、明辨之、篤行之、禮記中庸

【朱註】學問思辨所以擇善而爲知、篤行所以固執而爲仁、程子曰、五者廢其一、非學也。

誠則明矣、明則誠矣、同上

【鄭注】有至誠則必有明德、有明德則必有至誠、【孔疏】誠則明矣者、言聖人天性至誠、則能有明德、由至誠而致明也、明則誠矣者、謂賢人、由身聰明習學、乃致至誠、故云明則誠矣、是誠則能明、明則能誠、優劣雖異、二者皆通有至誠也。

【朱註】誠則無不明矣、明則可以至於誠矣、

學而不思則罔、思而不學則殆、論語

【何注】學不尋思其義、則罔然無所得、不學而思、終卒不得、徒使人精神疲殆。

【朱註】不求諸心，故昏而無得，不習其事，故危而不安。

學然後知不足，教然後知困。禮記學記

【鄭注】學則睹已行之所短，教則見己道之所未達。

夫學殖也，不學將落。左傳魯閔子馬語（昭十八年）

【杜注】殖，生長也，言學之進德，如農之殖苗，日新日異。【孔疏】夫學如殖草木也，令人日長日進，猶草木之生枝葉也，不學則才知日退，將如草木之墜落枝葉也。

困而不學，民斯爲下矣。論語

【何注】困謂有所不通。【邢疏】謂知困而不能學，此爲下愚之民也。

第九類 約知 十一則

自得之則居之安。孟子

【趙注】居之安，若己所自有也。

【朱註】自得於己，則所以處之者，安固而不搖。

知之者，不如好之者，好之者，不如樂之者。論語

【何注】包曰：學問知之者不如好之者篤，好之者不如樂之者深。

【朱註】尹氏曰：知之者，知有此道也；好之者，好而未得也；樂之者，有所得而樂之也。張敬夫曰：譬之五穀，知者知其可食者也，好者食而嗜之者也，樂者嗜之而飽者也。

博學於文，約之以禮。論語

【邢疏】此章君子若博學於先王之遺文，復用禮以自檢約，則不違道也。

【朱註】約，要也。君子學欲其博，故於文無不考，守欲其要，故其動必以禮。

以約失之者鮮矣。論語

【朱註】謝氏曰：不侈然以自放之謂約。尹氏曰：凡事約則鮮失，非止謂儉。

約也。

易則易知，簡則易從。

易繫辭

【朱註】人之所爲如乾之易，則其心明白而人易知，如坤之簡，則其事要約而人易從。

無田甫田，維莠騫騫。

詩齊風

【毛傳】甫，大也。大田過度而無人功，終不能獲。【鄭箋】喻人君欲立功致治，必勤身修德，積小以成高大。【孔疏】無田甫田，猶多方云，宅爾宅，田爾田，今人謂佃食，古之遺語也。周禮授民田，上地家百畝，中地家二百畝，下地家三百畝，謂其人力堪治，故禮以此爲度。過度，謂過此數而廣治田也。

【按】無田甫田者，謂毋治過度之田，使人力不堪治，致莠草繁興，終無所獲也。

言近而指遠者善言也，守約而施博者善道也。

孟子

【趙註】言近指遠，近言正心，遠可以事天也。守約施博，約守仁義，大可以施德於天下也。二者可謂善言善道也。

【朱註】不下帶而道存，舉目前之近事，而至理存焉，所以爲言近而指遠也。君子之守，修其身而天下平，此所謂守約而施博也。

觀於海者難爲水，遊於聖人之門者難爲言。

孟子

【朱註】此言聖人之道大也，所見既大，則其小者不足觀也。難爲水，難爲言，猶仁不可爲衆之意。

夫言豈一端而已，夫各有所當也。

禮記祭義

【鄭注】豈一端，言不可以一槩也。禮各有所當。

知（智）者無不知也，當務之爲急。

孟子

【趙注】知者知所務善也。【孫疏】孟子言謂之智者以其多知，故無所

有而不知者也，然而但當知要務爲急耳。

【朱註】知者無不知，然常以所當務者爲急，則事無不治，而其爲知也大矣。

知之爲知之，不知爲不知，是知也。

論語

【皇疏】若知則云知，不知則云不知，能如此者，是有知之人也。

【朱註】所知者則以爲知，所不知者則以爲不知，如此則雖或不能盡知，而無自欺之蔽，亦不害其爲知矣。况由此而求之，又有可知之理乎。

第十類 慎言 九則

好言自口，莠言自口。

詩小雅

【毛傳】莠，醜也。【鄭箋】自，從也。此疾訛言之人，善言從女口出，惡言亦從女口出，女口一爾，善也，惡也，同出其中，謂其可賤。

言以足志，文以足言，不言，誰知其志；言之無文，行而不遠。左傳載仲尼引志加

釋語（襄二十五年）

【杜注】足，成也。行而不遠者，雖得行，猶不能及遠。

辭之輯矣，民之洽矣。詩大雅

【毛傳】輯，和洽也。【鄭箋】辭，詞氣，謂政教也。王者政教和悅，順於民，則民心合定。

【孔疏】言王者若出教令，其詞氣之和順矣，則下民之心相與合聚矣。

斯言之玷，不可為也。詩大雅

【毛傳】玷，缺也。【鄭箋】斯，此也。人君政教一失，誰能反覆之。【孔疏】若此政教言語之有缺失，則遂往而不可改為，王者安危在於出令，故特宜慎之。

吉人之辭寡，躁人之辭多。易繫辭

【孔疏】吉人之辭寡者，以其吉善辭直，故辭寡也。躁人之辭多者，以其煩躁，故其辭多也。

君子無易由言，耳屬於垣。詩小雅

【鄭箋】由，用也。王無輕用讒人之言，人將有屬耳於壁而聽之者。知王有所受之，知王心不正也。

言顧行，行顧言。禮記中庸

【朱註】行者踐其實，謹者擇其可，德不足而勉，則行益力，言有餘而詛，則謹益至，謹之至，則言顧行矣，行之力，則行顧言矣。

其言之不忤，則爲之也難。論語

【何注】馬曰，忤，慙也。內有其實，則言之不慙，積其實者爲之難。

【朱註】大言不慙，則無必爲之志，而不自度其能否矣。欲踐其言，豈不難哉。

巧言如簧，顏之厚矣。詩小雅

【鄭箋】顏之厚者，出言虛偽，而不知慙於人。

第十一類 正習 十二則

性相近也，習相遠也。論語

【何注】孔曰：君子慎所習。

【朱註】此所謂性，兼氣質而言者也。氣質之性，固有美惡之不同矣。然以其初而言，則皆不甚相遠也。但習於善則善，習於惡則惡，於是始相遠耳。

良冶之子，必學爲裘；良弓之子，必學爲箕。禮記學記

【鄭注】良冶之子，必學爲裘者，仍見其家錮補穿鑿之器也。補器者，其金柔乃合，有似於爲裘。良弓之子，必學爲箕者，仍見其家橈角幹也。橈角幹者，其材宜調，調乃三體乃勝，有似於爲楊柳之箕。

惟聖罔念作狂，惟狂克念作聖。書多方

【孔傳】惟聖人無念於善，則爲狂人，惟狂人能念於善，則爲聖人，言桀紂非實狂愚，以不念善故滅亡。

沈潛剛克，高明柔克。書洪範

【孔傳】剛克，剛能立事，柔克，和柔能治。沈潛，謂地，雖柔亦有剛，能出金石，高明，謂天，言天爲剛德，亦有柔克，不干四時，喻臣當執剛以正君，君當執柔以納臣。【孔疏】此舉天地之德，以喻君臣之交，地之德深沈而柔弱矣，而有剛能出金石之物也，天之德高明剛強矣，而有柔能順陰陽之氣也，以喻臣道雖柔，當執剛以正君，君道雖剛，當執柔以納臣也。

【按】左傳衛甯嬴引此語以譏晉陽處父，謂夫子壹之，其不沒乎，則剛克柔克，指變化氣質而言。

剛氣不怒，柔氣不備。禮記樂記

【鄭注】懾猶恐懼也。【孔疏】剛氣不怒柔氣不懾者言先王節之使剛氣者不至暴怒柔氣者不至恐懼也。

昧且不顯後世猶怠。左傳晉叔向引讒鼎銘（昭三年）

【杜注】昧且早起也。丕大也言夙興以務大顯後世猶解（懈）怠。

作法於涼其敝猶貪。左傳鄭渾罕語（昭四年）

【杜注】涼薄也。

君子慎始差若豪釐繆以千里。禮記經解引易

【孔疏】言君子謹慎事之初如差錯若豪釐之小至後廣大錯繆以至千里之大。

不遠復无祇悔。易復卦

【王注】最處復初始復者也復之不速遂至迷凶不遠而復幾悔而反以此修身患難遠矣。

過而不改，是謂過矣。論語

【邢疏】此章戒人改過，人誰無過，過而能改，善莫大焉，過而不改，是謂過矣。

尤而效之，其又甚焉。左傳周靈王語（襄二十一年）

【杜注】尤，晉逐盈而自掠之，是效尤。

【按】傳文，晉逐欒盈，盈過周，周西鄙掠之，故杜云然。又僖二十四年傳，晉介之推語與此同，僅其字易爲罪字。

惡之易也，如火之燎于原，不可鄉（向）邇，其猶可撲滅。左傳引商書語（隱六年）

【杜注】商書盤庚言惡易長，如火焚原野，不可鄉邇，其猶可撲滅，言不可撲滅也。

第十二類 教謙 十一則

天道虧盈而益謙，地道變盈而流謙，鬼神害盈而福謙，人道惡盈而好謙。易謙卦

【孔疏】天道虧盈而益謙者，虧謂減損，減損盈滿而增益謙退，若日中則昃，月盈則食，是虧減其盈，盈者虧減，則謙者受益也。地道變盈而流謙者，丘陵川谷之屬，高者漸下，下者漸高，是改變盈者，流布謙者也。鬼神害盈而福謙者，驕盈者被害，謙退者受福，是害盈而福謙也。人道惡盈而好謙者，盈溢驕慢，皆以惡之，謙退恭巽，悉皆好之。

无平不陂，无往不復。易泰卦

【王注】乾本上也，坤本下也，而得泰者降與升也，而三處天地之際，將復其所處，復其所處，則上守其尊，下守其卑，是故无往而不復也，无平而不陂也。

日中則昃，月盈則食。易豐卦

【孔疏】盛必有衰。自然常理。日中至盛。過中則昃。月滿則盈。過盈則食。

亢龍有悔。易乾卦

【朱註】亢者過於上而不能下之意也。陽極於上。動必有悔。

升而不已。必困。易序卦

【孔疏】升者登上之義。困者窮厄委頓之名。

貴而知懼。懼而思降。乃得其階。左傳鄭然明語（襄二十四年）

敖（傲）不可長。欲不可從。志不可滿。樂不可極。禮記曲禮

【孔疏】敖不可長者。敖者矜慢在心之名。長者行敖著迹之稱。夫矜我慢物。中人不免。若有心而無迹。則於物無傷。若迹著而行用。則侵虐爲甚。傾家亡國。必由乎此。故戒不可長。欲不可從者。心所貪愛爲欲。則飲食男女。人之大欲存焉。是也。人皆有欲。但不得從之而已。志不可滿者。六情徧觀。在心未見爲志。凡人各有志意。但不得自滿。故六韜云。器滿則傾。志滿則

覆樂不可極者，天子宮縣以下，皆得有樂，但主歡心，人情所不能已，當自抑止，不可極爲，故樂記云樂盈而反，以反爲文。

雖鞭之長，不及馬腹。

左傳晉伯宗引古語（宣十五年）

【杜注】言非所擊。

川澤納汙，山藪藏疾，瑾瑜匿瑕，國君含垢。

左傳晉伯宗引諺（宣十五年）

【杜注】川澤納汙者受汙濁，山藪藏疾者山之有林藪，毒害者居之，瑾瑜匿瑕者，匿亦藏也，雖美玉之質，亦或居藏瑕穢，國君含垢者，忍垢恥。

以能問於不能，以多問於寡，有若無，實若虛，犯而不校。

【何注】校報也，言見侵犯，不報。【邢疏】言其好學持謙，見侵犯而不報也。【朱註】唯知義理之無窮，不見物我之有間，故能如此。謝氏曰：不知有餘在己，不足在人，不必得爲在己，失爲在人，非幾於無我者不能也。

高而不危，所以長守貴也；滿而不溢，所以長守富也。

孝經

【按】上文云，在上不驕，高而不危，制節謹度，滿而不溢。

第十三類 教勤 十一則

民生在勤，勤則不匱。左傳楚莊王語（宣十二年）

【按】匱，乏也。言勤則無匱乏也。

國不競亦陵。左傳鄭子產語（昭十三年）

【按】原文云，國不競亦陵，何國之爲。杜注云，不競爭則爲人所侵陵，不成爲國。

吾少也賤，故多能鄙事。論語

【何注】包曰，我少小貧賤，常自執事，故多能爲鄙人之事。

【朱註】言由少賤，故多能，而所能者鄙事爾。

君子勞心，小人勞力。左傳晉知武子語（襄九年）

【按】孟子曰、或勞心、或勞力、勞心者治人、勞力者治於人、治於人者食人、治人者食於人、是君子小人以位言、

愛之能勿勞乎、忠焉能勿誨乎、論語

【何注】孔曰、言人有所愛、必欲勞來之、有所忠、必欲教誨之、

【朱註】蘇氏曰、愛而勿勞、禽犢之愛也、忠而勿誨、婦寺之忠也、愛而知勞之、則其爲愛也深矣、忠而知誨之、則其爲忠也大矣、

不索何獲、左傳吳公子光語（昭二十七年）

【按】索求也、原文云、上國有言曰、不索何獲、我王嗣也、吾欲求之、此言不求何能有得、

懷與安、實敗名、左傳齊姜語（僖二十三年）

【按】懷與安、謂苟求安逸也、

需、事之賊也、左傳齊陳子行語（哀十四年）

【杜注】言需疑則害事。

君子懷德，小人懷土，君子懷刑，小人懷惠。

論語

【何注】君子懷德，懷安也。小人懷土者，重遷。君子懷刑者，安於法。小人懷惠，恩惠也。

【朱註】懷，思念也。懷德謂存其固有之善，懷土謂溺其所處之安，懷刑謂畏法，懷惠謂貪利。君子小人趣向不同，公私之間而已矣。尹氏曰：樂善惡不善，所以爲君子，苟安務得，所以爲小人。

君子之愛人也以德，細人之愛人也以姑息。

禮記檀弓曾子語

【鄭注】君子之愛人也以德，成己之德也。細人之愛人也以姑息，息猶安也。言苟容取安也。

自時厥後，立王，生則逸，生則逸，不知稼穡之艱難，不聞小人之勞，惟耽樂之從，自時厥後，亦罔或克壽。

書無逸

【孔傳】自時厥後立王生則逸者，從是三王各承其後而立者，生則逸，豫無度，不知稼穡之艱難，言與小人之子同其敝，惟耽樂之從，過樂謂之耽，惟樂之從，言荒淫，自是厥後，亦罔或克壽者，以耽樂之故，從是其後亦無有能壽考。

【孔疏】從是三王其後所立之王，生則逸，豫不知稼穡之艱難，不聞小人之勞苦，惟耽樂之事，則從而爲之，故從是其後諸王，無有能壽考者，或十年，或七八年，或五六年，或四三年，言逸樂之損壽，故舉以戒成王也。

第十四類 教憂教豫 十七則

生於憂患，死於安樂。

孟子

【趙注】死亡也，安樂怠慢，使人亡其知能也。【孫疏】人以憂患謀慮而生，以安樂怠慢而死也。

【朱註】人之生全出於憂患，而死亡由於安樂矣。

獨孤臣孽子，其操心也危，其慮患也深，故達。孟子

【趙注】自以孤微，懼於危殆之患，而深慮之，勉爲仁義，故至於達也。

【朱註】孤臣遠臣，孽子庶子，皆不得於君親，而常有疢疾者也。達，謂達於事理，所謂德慧術知也。

人無遠慮，必有近憂。論語

【何注】王曰：君子當思患而預防之。

【朱註】蘇氏曰：人之所履者，容足之外，皆爲無用之地，而不可廢也。故慮不在千里之外，則患在几席之下矣。

不曰如之何如之何者，吾末如之何也已矣。同上

【何注】孔曰：不曰如之何者，猶言不曰奈是何。吾末如之何者，言禍難已成，吾亦無如之何。

【朱註】如之何如之何者，熟思而審處之辭也。不如是而妄行，雖聖人亦

無如之何矣。

自非聖人，外寧必有內憂。

左傳晉范文子語（成十六年）

【杜注】驕亢則憂患生也。

迨天之未陰雨，徹彼桑土，綢繆牖戶。

詩豳風孟子引之

【毛傳】迨及徹剝也。桑土，桑根也。【鄭箋】綢繆猶纏綿也。此鴟鴞自說作

巢至苦如是，以喻諸臣之先臣，亦及文武未定天下，積日累功，以固定此

官位與土地。

【孟子】詩云：迨天之未陰雨，徹彼桑土，綢繆牖戶。今此下民，或敢侮予，孔

子曰：爲此詩者，其知道乎？能治其國家，誰敢侮之。【朱註】詩豳風鴟鴞

之篇，周公之所作也。迨及也，徹取也。桑土，桑根之皮也。綢繆，纏綿補葺也。

牖戶，巢之通氣出入處也。予，鳥自謂也。言我之備患詳密如此，今此在下

之人，或敢有侮予者乎？周公以鳥之爲巢如此，比君之爲國，亦當思患而

預防之，孔子讀而贊之，以爲知道也。

無已太康，職思其居，無已太康，職思其外，無已太康，職思其

憂，詩唐風

【毛傳】已，甚，康，樂，職，主也。【鄭箋】無已太康者，君雖當自樂，亦無甚大樂，欲其用禮爲節也。職思其居者，當主思於所居之事，謂國中政令。職思其外者，外謂國外至四境。職思其憂，憂可憂也。憂者謂隣國侵伐之憂。

其亡其亡，繫於苞桑。易否卦

【王注】處君子道消之時，已居尊位，何可以安，故心存將危，乃得固也。【孔疏】其亡其亡，繫於苞桑者，恒自戒懼，其意常懼其危亡，言丁寧戒慎如此也。繫於苞桑者，苞本也。凡物繫于桑之苞本，則牢固也。若能其亡其亡，以自戒慎，則有繫于苞桑之固，无傾危也。

【繫辭】子曰：危者安其位者也，亡者保其存者也，亂者有其治者也。故君

子安而不忘危，存而不忘亡，治而不忘亂，是以身安而國家可保也。易曰：其亡其亡，繫於苞桑。

夫人必自侮，然後人侮之；家必自毀，而後人毀之；國必自伐，而後人伐之。孟子

【趙注】人先自爲可侮慢之行，故見侮慢也；家先自爲可毀壞之道，故見毀也；國先自爲可誅伐之政，故見伐也。

【朱註】禍福之來，皆其自取。

兼弱攻昧。左傳晉隨武子引書（宣十二年）

【尚書】兼弱攻昧，取亂侮亡。【孔傳】弱則兼之，闇則攻之，亂則取之，有亡形則侮之。

【杜注】昧，昏亂經法也。

亡者侮之，亂者取之，推亡固存，國之道也。左傳晉中行獻子引仲虺語（襄十四年） 鄭子皮引同（襄三十年）

【孔疏】尚書仲虺之誥云、兼弱攻昧、取亂侮亡、推亡固存、邦乃其昌、孔安國云、弱則兼之、闇則攻之、亂則取之、有亡形則侮之、有亡道則推而亡之、有存道則輔而固之、王者如此、國乃昌盛、此傳取彼之意、而改爲之辭、其言非本文也、

居安思危、

左傳晉魏絳引書語（襄十一年）

【杜注】書曰居安思危、逸書、

【按】此安不忘危之意、

備豫不虞、

左傳季文子述古（文六年）

【按】與尚書儆戒無虞同義、孔傳、虞度也、無億度謂無形、戒於無形、備慎

深也、豫同預、備豫不虞、言預備於無形也、

凡事豫則立、

禮記中庸

【按】立、成也、言凡事有豫備則成也、

不備不虞，不可以師。左傳君子語（隱五年）

善爲國者不師，善師者不陳，（陣）善陳者不戰，善戰者不死，善死

者不亡。穀梁傳（莊八年）

【范氏集解】善爲國不師者，道之以德，齊之以禮。江熙曰：鄰國相望，歡若親戚，何師之爲？善師不陳者，師衆素嚴，不須耀軍列。陳，江熙曰：上兵伐謀，何乃至陣？善陳不戰者，軍陳嚴整，敵望而畏之，莫敢戰。善戰不死者，投兵勝地，故無死者。江熙曰：辟實攻虛，則不死。善死不亡者，民盡其命，無奔背散亡者。江熙曰：見危授命，義存君親，雖沒猶存。

國無九年之畜，曰不足；無六年之畜，曰急；無三年之畜，曰國非其

國也。穀梁傳（莊二十八年）
禮記王制同

【按】畜，積也。鼂錯論貴粟疏云：聖王在上，而民不凍饑者，非能耕而食之，織而衣之也。爲開其資財之道也。故堯禹有九年之水，湯有七年之旱，而

國無捐瘠者，以畜積多，而備先具也。人情一日不再食則饑，終歲不製衣則寒，夫腹饑不得食，膚寒不得衣，雖慈母不能保其子，君安能有其民哉。明主知其然也，故務民於農桑，薄賦歛，廣畜積，以實倉庫，備水旱，故民可得而有也，可爲本文作註脚。

第十五類 教敬 二十九則

我其夙夜，畏天之威，于時保之。詩周頌

【鄭箋】于於，時是也。早夜敬天，於是得安文王之道。

予其懲而愆後患。詩周頌

【毛傳】愆，慎也。【鄭箋】懲，艾也。曰我其創艾於往時矣，畏慎後復有禍難。

戰戰兢兢，如臨深淵，如履薄冰。詩小雅

【毛傳】戰戰，恐也。兢兢，戒也。如臨深淵，恐墜也。如履薄冰，恐陷也。

一命而偃，再命而偃，三命而俯。左傳正考父鼎銘（昭七年）

君子有三戒，少之時，血氣未定，戒之在色；及其壯也，血氣方剛，戒之在鬪；及其老也，血氣既衰，戒之在得。論語

【何注】孔曰得貪得。【孔疏】此章言君子之人，自少及老，有三種戒慎之事也。少謂人年二十九以下，血氣猶弱，筋骨未定，貪色則自損，故戒之。壯謂氣力方當剛強，喜於爭鬪，故戒之。老謂五十以上，得謂貪得，血氣既衰，多好聚斂，故戒之。

君子有三畏，畏天命，畏大人，畏聖人之言。論語

【何注】畏天命，順吉逆凶之命也。畏大人，大人即聖人，與天地合其德，畏聖人之言，深遠不可易知測，聖人之言也。

【朱註】畏者，嚴憚之意也。天命者，天所賦之正理也。知其可畏，則其戒謹恐懼自有不能已者，而付畀之重可以不失矣。大人聖言，皆天命所當畏，知畏天命，則不得不畏之矣。

能敬無災、

左傳魯叔孫豹引志（昭三年）

【按】下文又曰敬逆

也

來者、天所福也、義略同、言敬可以消災、可以逐

福也、

懼以終始、其要无咎、

易繫辭

【孔疏】懼以終始者、言恒能憂懼於終始、能於始思終、於終思始也、其要

无咎者、若能始終皆懼、要會歸於无咎也、

衡而委蛇、必折、

左傳魯叔孫豹譏衛孫文子語（襄七年）

【杜注】衡、橫也、橫不順道必毀折、【孔疏】詩國風召南羔羊之篇、言大

夫賢者退朝而食、從公門、入私門、委蛇委蛇然、委蛇順從之貌、詩之此意

謂順也、今孫子爲臣而君自處、是橫不順道、以橫道而爲委蛇、其人必將

折毀、不得終其職位、

暴虎馮河、死而無悔者、吾不與也、必也臨事而懼、好謀而成者也、

論語

【何注】孔曰，暴虎，徒搏，馮河，徒涉。

【朱註】懼，謂敬其事，成，謂成其謀，行師之要，實不外此。

禮樂不可斯須去身，禮記祭義

【鄭注】斯須，猶須臾也。

服以旌禮，禮以行事事有其物，物有其容。左傳晉屠蒯語（昭九年）

【杜注】旌，表也，事，政也，物，類也，容貌也。【孔疏】吉有弁冕，凶有衰麻，禮有吉凶之異，作衣服以表之，如此之類，是服以旌禮也。周禮司服，六冕以祭祀，皮弁以視朝，韋弁以即戎，冠弁以田獵，如此之類，是禮以行事也。傳稱衰麻有哭泣，樂有歌舞，如此之類，是事有其物，言行事各有其物類也。記稱衰麻則有哀色，端冕則有敬色，介冑則有不可犯之色，周禮保氏教國子六儀，一曰祭祀之容，二曰賓客之容，三曰朝廷之容，四曰喪祭之容，五

曰軍旅之容、六曰車馬之容、少儀曰、言語之美、穆穆皇皇、朝廷之美、濟濟
翔翔、祭祀之美、齊齊皇皇、車馬之美、駢駢翼翼、鸞和之美、肅肅雍雍、如此
之類、是物有容也、

是故君子、恥服其服而無其容、恥有其容而無其辭、恥有其辭而
無其德、恥有其德而無其行、禮記表記

【鄭注】無其行、謂不行其德、【孔疏】德在於內、行接於外、內既有德、當須
以德行之於外、以接於人民、若有德無行、是君子所恥、

服之不衷、身之災也、左傳君子語（僖二十四年）

【杜注】衷、猶適也、

心不在焉、視而不見、聽而不聞、食而不知其味、禮記大學

【朱註】心有不存、則無以檢其身、是以君子必察乎此而敬以直之、然後
此心常存而身無不脩也、

哀樂失時，殃咎必至。左傳鄭厲公語（莊二十年）

【原文】王子頹享五大夫，樂及徧舞，鄭伯聞之，見虢叔曰：寡人聞之，哀樂失時，殃咎必至。今王子頹歌舞不倦，樂禍也。夫司寇行戮，君爲之不舉，而况敢樂禍乎？奸王之位，禍莫大焉。臨禍忘憂，憂必及之。

【按】與後鄭子羽語義略同。

哀樂而樂哀，皆喪心也。左傳宋樂祁述聞（昭二十五年）

【杜注】哀樂，可樂而哀，樂哀，可哀而樂也。

夫弗及而憂，與可憂而樂，與憂而弗害，皆取憂之道也。憂必及之。

左傳鄭子羽語（昭元年）

【按】與鄭厲公語可互相發明。

莊敬日強，安肆日偷。禮記表記

【鄭注】肆，猶放恣也。偷，苟且也。肆，或爲褻。【孔疏】言君子之人，恒能莊

敬、故德業日強、安肆日偷者、肆謂放恣、偷謂苟且、言小人安樂放肆、則其情性日爲苟且、

抑抑威儀、維德之隅、詩大雅

【毛傳】抑抑、密也、隅、廉也、【鄭箋】人密審於威儀、抑抑然、是其德必嚴正也、古之賢者、道行心平、可外占而知內、如宮室之制、內有繩直、則外有廉隅、

古訓是式、威儀是力、詩大雅

【鄭箋】古訓、先王之遺典也、式、法也、力、猶勤也、勤威儀者、恪居官次、不懈（懈）于位也、【孔疏】古訓者、故舊之道、故爲先王之遺典也、是力者、勤力爲之、故云勤、勤威儀者、恪居官次、謂恒常恭敬、居於官之次舍、不解怠於其職位也、

有威而可畏、謂之威、有儀而可象、謂之儀、左傳衛北宮文子語（襄三十一年）

【原文】衛侯在楚，北宮文子見令尹圍之威儀，言於衛侯曰：令尹似君矣，將有他志，雖獲其志，不能終也。詩云：靡不有初，鮮克有終，終之實難。令尹其將不免。公曰：子何以知之？對曰：詩云：敬慎威儀，惟民之則。令尹無威儀，民則無焉，民所不則，以在民上，不可以終。公曰：善哉！何謂威儀？對曰：有威而可畏謂之威，有儀而可象謂之儀。

【按】此釋威儀之義，象，法也。書曰：象以典刑。

威儀抑抑，德音秩秩。

詩大雅

【毛傳】抑抑，美也。秩秩，有常也。【鄭箋】抑抑，密也。秩秩，清也。成王立朝之威儀，致密無所失，教令又清明，天下皆樂仰之，無有怨惡。

出門如見大賓，使民如承大祭。

論語

【何注】孔云：爲仁之道，莫尚乎敬。【邢疏】大賓，公侯之賓也。人之出門，失在倨傲，故戒之。出門如見公侯之賓。

無理不動，無節不作。禮記仲尼燕居

【孔疏】君子無理不動，無節不作者，言古之君子，若無禮之道理，不妄興動，無樂之節制，不敢興作。

其容不改，出言有章。詩小雅

【鄭箋】其容不改，言其動作容貌有常，出言有章，言其吐口言語，有法度文章也。

君子不失足於人，不失色於人，不失信於人。禮記表記

【鄭注】失謂失其容止之節也。【孔疏】不失足於人者，足容重，不失此足之容儀，而作夸毗進退於衆人也，不失色於人者，色容須矜莊，不失此色之容儀，而作籛籛戚施於衆人也，不失信於人者，口容須安止，不失此口之容儀，而作詔私曲媚於衆人也。

在彼無惡，在此無射，庶幾夙夜，以永終譽。詩周頌射一作斲

【鄭箋】在彼謂居其國，無怨惡之者，在此謂其來朝，人皆愛敬之，無厭之者，永，長也，譽，聲美也。

夙夜基命宥密，無聲之樂也，威儀逮逮，不可選也，無體之禮也，凡民有喪，匍匐救之，無服之喪也。禮記孔子閒居

【鄭注】密靜也，言君夙夜謀爲政教以安民，則民樂之，此非有鐘鼓之聲也，逮逮安和之貌也，言君之威儀安和逮逮然，則民傲之，此非有升降揖讓之禮也，救之，調恤之，言君於民有喪，有以調恤之，則民傲之，此非有衰經之服。

第十六類 教儉 九則

養心莫善於寡欲。孟子

【趙注】養治也，寡少也，欲利欲也。

【朱註】欲如口鼻耳目四支之欲，雖人所不能無，然多而不節，未有不失。

其本心者，學者所當深戒也。

儉，德之共也，侈，惡之大也。

左傳魯御孫語（莊二十四年）

【按】共德，言人所同以爲德。

量入以爲出。

禮記王制

【鄭注】出，謂所當給爲出。【孔疏】量其今年入之多少，以爲來年出用

之數。

不節若，則嗟若。

易節卦

【王注】若，辭也。以陰處陽，以柔處剛，違節之道，以至哀嗟。【孔疏】節者，制度之卦，處節之時位不可失。六三以陰處陽，以柔乘剛，失違驕逆，違節之道，禍將及已，以至哀嗟。故曰：不節若則嗟若也。

欲敗度，縱敗禮。

左傳鄒子皮引書語（昭十年）

【杜注】逸書。【孔疏】尚書太甲篇也。孔傳云：言已放縱情欲，毀敗禮儀。

法度、

節者(嗜)欲定心氣、禮記月令

【陳註】節其諸事之愛欲、凡以定心氣而備陰疾也、

二簋可用享、易損卦

【孔疏】用二簋可用享者、明行損之禮、貴夫誠信、不在於豐、既行損以信、何用豐爲、二簋至約、可用享祭矣、

豈其食魚、必河之魴、豈其取妻、必齊之姜、豈其食魚、必河之鯉、豈其取妻、必宋之子、詩陳風

【鄭箋】此言何必河之魴、然後可食、取其口美而已、何必大國之女、然後可妻、亦取貞順而已、齊姜姓、宋子姓、

子謂衛公子荆善居室、始有曰苟合矣、少有曰苟完矣、富有曰苟美矣、論語

【何注】王曰、荆與蘧瑗史鮪、並爲君子。【孔疏】此章孔子稱衛公子荆有君子之德也、善居室者、言居家理也、始有曰苟合矣者、家始富有、不言己才能所致、但曰苟且聚合也、少有曰苟完矣者、又少有增多、但曰苟且完全矣、富有曰苟美矣者、富有大備、但曰苟且有此富美耳、終無泰侈之心也。

第十七類 教誠教恕 教自省 二十六則

君子所履、小人所視、詩小雅

【鄭箋】此言古者天子之恩厚也、君子皆法效而履行之、其如砥矢之平、小人又皆視之、共之無怨、共音恭本 又作恭【孔疏】言其時君子皆共法傲所以履而行之、以周道布其砥矢之平直、時小人皆共承奉所以視而供之、既

君子履其厚、小人視其平、是上下相和、舉世安樂、

莫見乎隱、莫顯乎微、禮記中庸

【朱註】隱、暗處也、微、細事也、言幽暗之中、細微之事、跡雖未形、而幾則已動、人雖不知、而已獨知之、則是天下之事、無有著見明顯、而過於此者、是以君子既常戒懼、而於此尤加謹焉、所以遏人欲於將萌、而不使其潛滋、暗長於隱微之中、以至離道之遠也、

潛雖伏矣、亦孔之炤、詩小雅

【鄭箋】言其潛伏於淵、又不足以逃、甚炤炤易見、

爾之教矣、民胥效矣、詩小雅

【鄭箋】爾、女、女幽王也、見女之教令、無善無惡、所尚者天下之人皆學之、

言上之化下、不可不慎、

下之事上也、不從其所令、從其所行、禮記緇衣

【鄭注】言民化行、不主於言、

其身正不令而行、其身不正、雖令不從、論語

【何注】令，教令也。【邢疏】此章言爲政者當以身先也，言上之人，其身若正，不在教令，民自觀化，其身若不正，雖教令滋章，民亦不從也。

弗躬弗親，庶民弗信。詩小雅

【鄭箋】此言王之政不躬而親之，則恩澤不信於衆民矣。【孔疏】毛以爲尹氏不可任，欲令王親爲政，故責王，言王爲政，由不躬爲之，不親行之，故天下庶民之言，不可信也。

身不行道，不行於妻子，使人不以道，不能行於妻子。孟子

【朱註】身不行道者，以行言之，不行者，道不行也，使人不以道者，以事言之，不能行者，令不行也。

人莫知其子之惡，莫知其苗之碩。禮記大學

【朱註】溺愛者不明，貪得者無厭，是則偏之爲害。【按】碩，大也，肥也。

知爲人子，然後可以爲人父，知爲人臣，然後可以爲人君，知事人，

然後能使人。禮記文王世子

【按】此言教世子之法，爲下文抗世子法於伯禽張本，其義與後條略同。所求乎子，以事父，未能也。所求乎臣，以事君，未能也。所求乎弟，以事兄，未能也。所求乎朋友，先施之，未能也。禮記中庸

【孔疏】言此四者欲明求之於他人，必先行之於己，欲求其子以孝道事己，己須以孝道事父母，故云所求乎子以事父，未能也。所求乎臣以事君，未能也。譬如己是諸侯，欲求於臣以忠事己，己當先行忠於天子，是全臣道也。所求乎朋友，先施之，未能也。欲求朋友以恩惠施己，則己當先施恩惠於朋友也。

責人斯無難，惟受責俾如流，是惟艱哉。書秦誓引古人語

【孔傳】人之有非，以義責之，此無難也。若己有非，惟受人責即改之，如水流下，是惟艱哉。

議道自己而置法以民。

禮記表記

【鄭注】自己自盡已所能行，【孔疏】議道自己者，好仁之法，須恩惠及人，當恕已而行，故君子謀議道理，先自己而始，置法以民者，已所能行，乃施於人，故云置法以民，言從已而始，乃可以施置法度於它人。

有諸已而後求諸人，無諸已而後非諸人。

禮記大學

【朱註】有善於已，然後可以責人之善，無惡於已，然後可以正人之惡，皆推已以及人，所謂恕也，不如是，則所令反其所好，而民不從矣。

無瑕者可以戮人。

左傳楚椒舉語（昭四年）

【原文】執齊慶封而盡滅其族，將戮慶封，椒舉曰：臣聞無瑕者可以戮人，慶封惟逆命，是在此，其肯從於戮乎？播於諸侯，焉用之？王弗聽，負之斧鉞，以徇於諸侯，使言曰：無或如齊慶封，弑其君，弱其孤，以盟其大夫，慶封曰：無或如楚共王之庶子圍，弑其君兄之子麇而代之，以盟諸侯，王使速

殺之。

【按】書不用命戮於社，戮者聲其罪徇於衆而殺之也。瑕，瑕疵過也。無瑕者可以戮人，言惟無過之人，乃可以聲人之罪而殺之也。

施諸已而不願，亦勿施於人。

禮記中庸

【朱註】施諸已而不願，亦勿施於人，忠恕之事也。以己之心，度人之心，未嘗不同，故己之所不欲，則勿以施之於人。張子所謂以愛己之心愛人，則盡仁是也。

無言不讎，無德不報。

詩大雅

【毛傳】讎，用也。【鄭箋】教令之出，如賣物，物善則其售賈（價）貴，物惡則其售賈賤，德加於民，民則以義報之。【孔疏】王之所出，無有一言而不爲人用，善惡人皆承而用之，無有恩德而下不報答之，言王有善德，人必報王。

愛人者人恒愛之，敬人者人恒敬之。孟子

【趙注】愛敬施行於人人亦必反報之於己也。

言悖而出者，亦悖而入；貨悖而入者，亦悖而出。禮記大學

【朱註】悖逆也。此以言之出入，明貨之出入也。

愛人不親，反其仁；治人不治，反其智；禮人不答，反其敬。孟子

【趙注】反其仁，已仁猶未至邪，反其智，已智猶未足邪，反其敬，已敬猶未

恭邪，反求諸身，身已正則天下歸就之，服其德也。

多行不義，必自斃。左傳鄒莊公語（隱元年）

【按】斃，敗也。言多行不義，則必自敗。

多行無禮，必自及也。左傳君子引志（襄四年）

【按】必自及，謂必自及於禍也。

戒之戒之，出乎爾者，反乎爾者也。孟子引曾子語

【趙注】言上所出善惡之命，下終反之，不可不戒也。

慎始而敬終，終以不困。

左傳衛太叔文子引書（襄二十五年）

【杜注】逸書【孔疏】尚書蔡仲之命云，慎厥初，惟厥終，終以不困，此所引者，蓋即彼文學者各傳所聞，而字有改易，或引其意，而不全其文，故不同也。

【書蔡仲之命】慎厥初，惟厥終，終以不困。【孔傳】作事云爲，必慎其初，念其終，則終用不窮。

【按】惟，思念也，猶敬慎之意也，兩文字有出入，而其義實同。

言必慮其所終，而行必稽其所敝。

禮記緇衣

【鄭注】言必慮其所終者，謂初出言之時，必思慮此言終末可恆行以否，而行必稽其所敝者，稽考也，言欲行之時，必須先考校此行至終敝之時，無損壞以否。

君子之行，思其終也，思其復也。左傳衛太叔文子語（襄二十五年）

【杜注】思其終者，思使終可成，思其復者，思其可復行。

第十八類 教恒 十二則

人而無恒，不可以作巫醫。論語引南人之言

【何注】言巫醫不能治無恒之人。

【朱註】恒，常久也。巫，所以交鬼神，醫所以寄死生，故雖賤役，而尤不可以無常。孔子稱其言而善之。

行遠必自邇，登高必自卑。禮記

【鄭注】自從也。邇，近也。行之以近者，卑者，始以漸致之高遠。

所游必有常，所習必有業。禮記曲禮

【鄭注】緣親之意欲知之。

苟得其養，無物不長，苟失其養，無物不消。孟子

【趙注】苟得其養，若雨露於草木，法度於仁義，何有不長也。誠失其養，若斧斤牛羊之消草木，利欲之消仁義，何有不盡也。

其進銳者，其退速。孟子

【朱註】進銳者，用心太過，其氣易衰，故退速。

靡不有初，鮮克有終。詩大雅

【鄭注】民始則庶幾於善道，後更化於惡俗。

善不積不足以成名，惡不積不足以滅身。易繫辭

【按】原文下云，小人以小善爲无益而弗爲也，以小惡爲无傷而弗去也，故惡積而不可撓，罪大而不可解，可爲次句作註腳。

爲善者不改其度，故能有濟也。左傳鄭子產述聞（昭四年）

【杜注】度，法也。

君子深造之以道，欲其自得之也。孟子

【朱註】造，詣也。深造之者，進而不已之意。言君子務於深造，而必以其道者，欲其有所持循，以俟夫默識心通，自然而得之於己也。

勿忘，勿助長也。孟子

【朱註】當勿忘其所有事，而不可作爲以助其長，乃集義養氣之節度也。
【按】原文下云，宋人有閔其苗之不長者，而揠之者，芒芒然歸，謂其人曰，今日病矣，予助苗長矣，其子趨而往視之，苗則槁矣。天下之不助苗長者寡矣，以爲無益而舍之者，不耘苗者也；助之長者，揠苗者也，非徒無益，而又害之。此以不耘苗喻忘，而以揠苗喻助長，甚切。

如切如磋，如琢如磨。詩衛風 禮記論語均引之

【鄭箋】治骨曰切，象曰磋，玉曰琢，石曰磨。道其學而成也，聽其規諫以自脩，如玉石之見琢磨也。

【禮記大學】如切如磋者，道學也；如琢如磨者，自脩也。【朱註】道，言也。

學謂講習討論之事，自脩者省察克治之功。

【論語朱注】言治骨角者，既切之而復磋之，治玉石者，既琢之而復磨之，治之已精而益求其精也，喻義理之無窮，雖有得焉而未可遽自足也。

日就月將，學有緝熙于光明。

詩周頌

【毛傳】將，行也。光，廣也。【鄭箋】緝熙，光明也。日就月行，言當習之以積漸也。且欲學於有光明之光明者，謂賢中之賢也。【孔疏】日就，謂學之使每日有成就。月將，謂至於一月，則有可行，言當習之以積漸也。王身當理政事，而言學有光明，是王意以己不達於政，未能即任其事，且欲學作有光明於彼光明之人，謂選擇賢中之賢，乃從之學，以賢者必有光明之德，故以光明表賢也。

第十九類 明哲 三十二則

人心之不同，如其面焉。

左傳鄭子產語（襄三十一年）

【按】謂人面無同者，其心亦然，猶言人心難知也。

有不虞之譽，有求全之毀。

孟子

【朱註】虞，度也。呂氏曰：行不足以致譽，而偶得譽，是謂不虞之譽。求免於毀而反致毀，是謂求全之毀。言毀譽之言，未必皆實，脩己者不可以是遽爲憂喜，觀人者不可以是輕爲進退。

惡直醜正，實蕃有徒。

左傳晉司馬叔游引鄭書（昭二十八年）

【杜注】言害正直者，實多徒衆。【孔疏】以直爲惡，以正爲醜，惡直事醜。

正道如此人者，實蕃多有徒衆，言時世慕善者少，從惡者多。

盜憎主人，民惡其上。

左傳晉伯宗妻語（成十五年）

【註】謂羣小憎正人，常情亦忌勝己者，故君子當直而溫，庶能保身成事。

忘我大德，思我小怨。

詩小雅

【鄭箋】大德，切磋以道相成之謂也。

怨不在大，亦不在小。書康誥

【孔傳】不在大，大起於小，不在小，小至於大，言怨不可爲，故當使不順者順，不勉者勉。

怨豈在明，不見是圖。左傳周單子引夏書語（成十六年）

【杜注】逸書也，不見，細微也。【孔疏】夏書五子之歌第一章也，其爲人所怨者，豈必在明白之處乎，其於人所不見，當於是圖謀之，謂慎其細小之事也。

華而不實，怨之所聚也。左傳衛甯嬴語（文五年）

【杜注】華而不實者，言過其行也。

口惠而實不至，怨蓄及其身。禮記表記

【鄭注】善言而無信，人所惡也。

放於利而行，多怨。論語

【何注】孔曰、放於利而行、放、依也、每事依利而行、多怨、取怨之道、

【朱註】程子曰、欲利於己、必害於人、故多怨、

蠹、蠹有毒、左傳魯臧文仲語（僖二十二年）

【孔疏】說文云、盜、飛蟲、螫人者也、蠹、毒蟲也、通俗文云、蠹、長尾、謂之蠹、

象有齒以焚其身、左傳鄒子產語（襄二十四年）

【杜注】焚、斃也、【孔疏】焚是燒也、象不燒死、故訓爲斃、服虔云、焚讀曰
償、償、僵也、爲生齒牙僵臥其身、

【按】原文、象有齒以焚其身、賄也、喻貨賄之殺身耳、

匹夫無罪、懷璧其罪、左傳虞叔引周諺（桓十年）

【杜注】人利其璧、以璧爲罪、

慢藏誨盜、冶容誨淫、易繫辭

【孔疏】慢藏誨盜、冶容誨淫者、若慢藏財物、守掌不謹、則教誨於盜者、使

來取此物，女子妖冶其容，身不精懃，是教誨淫者使來淫已也。

懷必貪，貪必謀人，謀人，人亦謀已。左傳齊晏桓子語（宣十四年）

【孔疏】懷，思也，謂思高位也。既思高位必貪，貪必計謀他人，既謀去他人，他人亦謀去己，一國之人謀去之，何以不至亡也。

夫有尤物，足以移人，苟非德義，則必有禍。左傳晉叔向母語（昭二十八年）

【杜注】尤，異也。【孔疏】苟，誠也。誠不以德義自持，則必有禍。

怨之所聚，亂之本也。左傳周單子語（成十六年）

【杜注】怨爲亂階。

欲加之罪，其無辭乎。左傳晉里克語（僖十年）

【杜注】言欲加己罪，不患無辭。

我聞忠善以損怨，不聞作威以防怨。左傳鄭子產語（襄三十一年）

【杜注】忠善以損怨者，爲忠善則怨謗息，欲毀鄉校，卽作威。

躬自厚而薄責於人，則遠怨矣。論語

【何注】孔云：責已厚，責人薄，所以遠怨咎。

知命者不立乎巖牆之下。孟子

【朱註】命謂正命，巖牆牆之將覆者，知正命，則不處危地以取覆壓之禍。

無過亂門。左傳 鄭子產引諺（昭十九年）

【按】下文云：民有兵亂，猶憚過之，即釋此也。

邦有道，危言危行；邦無道，危行言孫。論語

【何注】包曰：邦有道，危言危行，危厲也；邦有道可厲言行也，邦無道危行

言孫，孫順也，厲行不隨俗，順言以遠害。

【朱註】危，高峻也，孫卑順也。尹氏曰：君子之持身不可變也，至於言，則有

時而不敢盡，以避禍也。

國有道，其言足以興；國無道，其默足以容。禮記 中庸

【孔疏】若國有道之時，盡竭知謀，其言足以興成其國，與謂發謀出慮，若無道之時，則韜光潛默，足以自容其身，免於禍害。

既明且哲，以保其身。詩大雅

【孔疏】既能明曉善惡，且又是非辨知，以此明哲，擇安去危，而保安其身，不有禍敗。

民之多辟，無自立辟。詩大雅 左傳孔子引（宣九年）

【毛傳】辟法也。【鄭箋】民之行多為邪辟者，乃女君臣之過，無自謂所建為法也。

【朱註】今民既多邪辟，豈可又自立邪僻，以導之邪。

【按】朱說近是。

素夷狄，行乎夷狄，素患難，行乎患難。禮記 中庸

【孔疏】鄉夷狄之中，行道於夷狄，夷狄雖陋，亦隨其俗而守道不改，鄉患

難之中，行道於患難，而臨危不傾，守死於善道也。

君子以遠小人，不惡而嚴。

易遯大象

【孔疏】君子當此遯避之時，小人進長，理須遠避，力不能討，故不可爲惡，復不可與之褻瀆，故曰不惡而嚴。

天地閉，賢人隱。

易文言

【孔疏】天地閉，賢人隱者，謂二氣不相交通，天地否閉，賢人潛隱，蓋言賢人君子於此之時，須謹慎也。

天地不交，否，君子以儉德辟難，不可榮以祿。

易否大象

【朱註】收斂其德，不形於外，以避小人之難，人不得以祿位榮之。

內文明而外柔順，以蒙大難，文王以之。

易明夷象

【孔疏】內懷文明之德，撫教六州，外執柔順之能，三分事紂，以此蒙犯大難，身得保全，惟文王能用之，故云文王以之。

其爲人也、小有才、未聞君子之大道也、則足以殺其軀而已矣、孟子

【趙注】言括之爲人、小有才慧、而未知君子仁義謙順之道、適足以害其
身也、

【朱註】恃才妄作、所以取禍、

【按】孟子此言、答門人問、以釋預知盆成括將見殺之由、可爲保身有需
明哲之反證、

#10
124942

三十年十月十一日

郭重志先生贈送